

نقصات

6372

AH 647

A

4647

برلین معاہدہ شدہ حرب عمومیہ قدر

# تورکینہ

## آلمانیا و آوروپا

مؤلف

محمود مختار

استانبول - مطبعہ عامرہ

۱۳۳۹

## افادە مؤلف

HALIL  
EDHEM

بو اثر ناچيزك ترتيب و تسويدينه ۱۹۱۷ دە يعنى ابرۋ  
ظفرك دول غريبه لهنه ميل ايتمكه باشلاديني بر صرە دە  
مباشرت ايتشدم .

بلكه يوزده طقسان نىبىتندە اسباب ظفره مالك اوله رق  
حربه كيرمش اولان آلمانلر ، حائز اولدقلى عظيم تفوق  
عسكريدن بحق استفادە ايلكى بيلسه يديلر فرانسەنك شماندە  
مانش دكزينه قدر ايلروليه رك انكليزلرله اولان رابطه و  
مواصله يى اك مؤثر صورتدە كسوب سرعتله تامين غالبيت  
ايدرلردى . ياخود ايجاد ايلدكلرى قرق ايكىلك حاوان طوپلريله  
ايلك حمله دە جنوبدن وەردون اوزرينه يورويه رك پارس يولنى  
آچوب فرانسە يى مقاومتدن اسقاط ايتمكه معتدل بر صلح  
شرائطى آلدە ايدە ييلورلردى . حالبوكه شرق و غرب جبهه لرنده  
يكديكرىنى ولى ايدن فاحش خطا ياي عسكريه يه ، سياست



ساحه سنده کی تدبیر سزلکار، مبالا تسزلقلارده منضم اولدیفندن  
درت سنه مذبوخانه مقاومتدن صکره، هزیمت قطعیه  
اوغرا دیلر.

خلقه مغرور، وعزم و حزمندن دور بر ایمپراطور ایله  
اطرافنه طولادینی دون سویه لی قوماندانلر، مداهن مشاورلر  
النده قالان طالع حرب، بزکینلکه اوغرایه رق نهایت خصم  
طرفنه چکدی.

وقتا که، قبل الحرب متقاعدین میاننه آتیلش بولنان  
هیندنبورغ، شرقده کی پارلاق فقط بیسود غلبه لرندن صکره  
عموم قوماندانی درعهده ایتدی. آرتق ایش ایشدن چکش  
وهیندنبورغک شیخوختی حسیله حقیقت حالده اداره حرب،  
فعال وعزمکار اولقله برابر احتمالات و ممکناتی بحق تمیز  
وتفریقندن غافل بولنان معاونی جنرال لودندورفه انتقال ایلشدی.  
حربک ایکنجی سنه سی برلین سفارتندن انفصال ایتش  
و باویراده اقامتکزین بولنش ایدم. او ائشاده آوستریا -  
مجارستان بزکین، دولت عثمانیه بیتکین برحاله کلکده ایدی؛



آلمانلرده آتی بی مظلم ، محاط اولدقلری مهالکدن تخلص  
 کریانی متعسر کورمکه باشلامشلردی . بو احوالک کیتدجکه  
 تأید ایتدیکی ۱۹۱۷ سنه سی اواسطنده فرانقفورتر چایتونفک  
 استانبول مخابری اولوب آلمانیا خارجیہ نظارتنه مداوم بولنان  
 هروایچه تصادف ایتدم . کندیسنه وضعیتک وخامتندن بحثله  
 دیدم که : « تورکیه یی اداره ایدن بی ادرا کلردن معقول برتدبیر  
 بکلنه مز ایسه ده آلمانیا نکل دوربینانه حرکتله تورکیه یی برصلح  
 منفرده سوق ایتسنه انتظار ایدیله بیلور ؛ زیرا ، شرقلک آزرمان  
 صکره عظیم هرج مرجلر ایچنده سقوطنه محل ویرمکسزین  
 موازنه حاضره نکل مهما ممکن وقایه وادامه سی آنجق اوسایه ده  
 قابل اوله بیلور . شاید آلمانیا ایچون پک وخیم کورینن آتی به  
 مطلقا تورکیه نکل ده اشتراک ایتسی ملتزم ایسه بیلمیدرکه  
 بوندن بالاخره آلمانلرده چوق متضرر اولورلر . »

کوزلری احتراض ویا نومیدی بورودیکی زمانلرده  
 معقولاته قولاق ویرمک معتاد اولمادیغندن بو سوزلرده باد  
 هوایه کیتمشدی .

ایشته او زمان بو کبی تفکرات سوقله برلین معاهده -  
 سندن صکره آلمانیا ایله بینم زده باشلایوب هر ساحه ده کیتدجه  
 کرمی کسب ایدن مناسبات و روابط سیاسی و عسکریه  
 و اقتصادی طولانیسیله ، سیاسیات جهانده حصوله کلان  
 عکس العمللرک برپیلانچوسنی ترتیه قرار ویردم . کتابی تدریجاً  
 توسیع ایله شکل حاضرنی اکتسابه سائق اولان عوامل  
 میانده ، سابقا شورای دولت اعضاسندن صفوتی ضیا بک  
 افندینک هممات مشوقانه سی ده بولندیغندن بونک تذکارینی  
 لازمه شکر کزاری عد ایدرم .

بعد المتار که هر طرفده انتشاره باشلایان آثار سیاسی و وثائق  
 رسمیه ، کتابک تثبیت ایتیش اولدیغی اساسات و نظریاتک صحتی  
 تصدیق ایدنجه بولردن سند اتخاذه صالحو اولدرینی مستشهادات  
 میانده ادخال ایلیه رک اثر ناچیزانه می اولافرانسزجه صکر  
 تورجه اوله رق یکیدن تسوید ایلدم . جزئی بعض علاوات  
 ایله اثرک لسانمه نقل و ترجمه سنده اسبق طربزون والیسی



محمد غالب بك افندی رفیق قدیمك مصروف اولان معاونت  
محبانه سندن طولانی ده کندیسنه بوراجقده بیان تشکرات  
ایدرم .

بعض متفکرین حربی ، اعتلای اخلاقه خادم بر واسطه  
جاودانی تلقی ایدرلر . افسوس ، تاریخك الك قانلی صحائفی ،  
وقایع مضبوطه ك الك قورقنچ اوانی احتوا ایدن جهان حربی ،  
بو ذهابك هر زمان طوغری اولمادیغنی اثبات ایتدی . زیرا  
حرب طولانیسیله هر مملکتده شاهد اولدیغمز سقوط اخلاق ،  
تصوری الیم بر درجهیه واردی . باخصوص مملکتمزده اون  
ایکی سنه امتداد ایدن جنك و جدالك احداث ایلدیکی حال  
ووضعك ساحه اخلاقیاتده بر اقدیغنی تخریبات ، هر کون بر بشقه  
طرزده نمایان اولدی . بو ضایعات ایچنده موجب تلف بر  
جهت ده تاریخن دن انتباه قابلیتنك انحطاطیدر .

ذاتاً ماضیدن عبرت آلمق عوامك خرجی دکل آنجق  
خواصده آرانیه بیلن مزیاتدنذر . یوکسلمکدن ایسه هر شیئی  
الك دون سویهیه ارجاع ایتك کبی تطبیق اسهل اولان عوامفریبانه

نظرياتك غلبه سيله افكار متعاله اربابنك اسكات اولدينى  
 صره لرده ، عبرت وانتباه خاصه لرینك ده ساحه افعالده اجرای  
 تأثیر ایدمه مامسی وحکمت حکومتک مستلزم اولدینى تأنی وتیقظ  
 قابلیتک اندارسه اوغرامسی بر امر طبعیدر . مع الاسف بوحال  
 بزده یکی بر شیء دکلدرد . اوزرمرزه وقتيله طرابلس غرب  
 و بالقان فجایی چوکه رک اک قیمتلی ، اک مهم الکالرک المزدن  
 چیقدینى و نیجه بلاد اسلامیه اعدا یدینه کچهرک حقیقی  
 تورکلرک دحون اولدقلری هنکامده ، احوال سیاسیه و شرائط  
 اجتماعیه مزده صلاح نمایان اولمازسه ، آسیای صغرا ده کی  
 ممالک متوارثه نك ده قریباً ضیاعی محقق اولدینى روزنامه  
 حرب عنوانلی اثر عاجزانه مده خالصانه بر لسان ایله بیان  
 ایتشدم . او دورک زمامدارانی ، خطا آلود طرز اداره لری ،  
 تشهیر ایدن کتابک انتشارینی منع ایدهرک غبار نسیان  
 آلتنده چورومکه محکوم قیلدیلر . بیلیم که الیوم وقایعک  
 انکشاف الیمی ومهالکک عینی نسبتده دوامی قارشیسنده  
 داستانلردن ، مدحیه لردن ، خیالپرستلکلردن کندیمری آلهرق



بر آزده لدنیات امور و حقایق شئون ایله اشتغاله رغبت  
کو ستره بیله جگمی یز؟

هر نه حال ایسه آتیا صبح صادق اوکنده کوزلرینی اشعه  
حقیقه آچق ضرورتنده قاله جق اولان نسل آتی، تورک آبا  
و اجدادینک بلند همتلریله وجوده کلش اولان قوجه برجهان  
دولتنک سکز اون سنه ظرفنده عدمه انتقالی موجب احوال  
و عوامل فوق العاده یی اوکر نمک احتیاج اخلاقیسنی انشاء الله  
حس ایدنجه اوزمان بسط حقایقه خادم و ثائق میاننده، نقائص  
و نواقصیله برابر، شو صحیفه لری ده بولندیر مغنی ناچیز بر خدمت  
عد ایتدم .

و من الله التوفیق



بسم الله الرحمن الرحيم

مدخل

کچر دیکمز جهان حربی ، کسب ایتدیکی وسعت و اهمیت و انتاج  
ایلدیکی انقلابات و تغیرات اعتباریله جنکیز زمانلرندن بری تاریخده  
کورلمه مش معظمات وقایعدندر . بو حربک احیا ایتدیکی ملتله ، احیا  
ایلدیکی ایمپراطورلقلر ، ایجاد قیلدیغی حالات و تحولات اجتماعی و الحاصل  
احداث ایلدیکی بالجمله انقلابات ، هر تخمین و تصورک فوقنده تجلیاتدندر .  
اومیانده ، یدی عصرلق هابسبورغ دولت معظمه سی ایله قوجه روسیه  
چارلغی تار مارا اولدی و بونلرک انقاضی آره سنده اولجه تحت تحکمه آلدقلری  
اقوام قدیمه نك الوان ملیه سی یکیدن پارلادی .

شرق و غربده تحولات کامله یه اوغرایان اسلاولق عالمی اوکنده  
یکی افقلر آچیلدی .

صوک زمانلرده احتراصات سیاسییه سی آفاقکیر اولان مجارستان  
دولتی خیلت قدیمه سنک ، بالا پروازلغنک سیئه سنه اوغرایوب حدود  
ملیه سنی بیله محافظه ایدممدی . رقیبلری اولان رومانی و صربییه جسیم  
برر دولت اولوب یوکسلدی .

آلمانیا یه کلنجه : جهان تفوقی خولیالرنندن ، رؤیالرنندن دهشتلی  
ضربه لرله اویانوب حقیقته کوز آچهرق کندینی انواع مهالک داخلیه



و خارجيه ايچنده بولدى . وحدت مليه سنك محافظه سنده بيله مشكلاته  
دوشدى . شرق قريبنده يونان دولتي، روم ايلينك الك مهم اقسامنه  
وارث و آطه لر دكزينك شمال سواحلنه مالك اوله رق سياسي، عسكري  
پك بيوك اهميت كسب ايتدى . عادتاً عثمانليغنى اورتهدن قالديروب قديم  
بيزانس دولتنى احيايه نامزد اولدى . انواع هجمات و صدماته رغماً  
عصر لرجه خادم الحرمين الشريفين قلمش و حاكم البرين و البحرين عنوانى  
محافظه ايدم بيلمش اولان سلطنت عثمانيه ، عاقبت پارچه لانبوب كوچك  
بر تورك حكومتنه منقلب و بو حال آفاق اسلاميه ده شرق استقلالنه  
براغت استهلال عد اولنان حكومات عربييه هيولالرينك ترسمنى باعث  
اولدى .

ديكر طرفده ايسه ، آنجق آمريقا قدرت وسطوتنك انضماميله  
نائل ظفر اوله بيلن ائتلاف دولترلرني اول و آخر سوق و تحريك ايليان  
احتراسات و تمايلات استيلاجويانه، جهان حربنك اجرا ايتديكي تخريبات  
او كنده بر درجه يه قدر دوچار ضعف و تزلزل اوله رق بين الملل مناسباتك  
پيش استقبالننده بالنسبه مصلحانه عامللر و احتماللر ترسم ايتمكه باشلادى .  
كيتد كجه عمق و وسعت كسب ايدن سوسياليسم اساساتى ايسه سياسيات  
و اقتصاديات نظريه لرني توازن جويانه انقلاب واديلرينه سوق ايدمرك  
سياسى امپرياليسم عليهنده جريانلر توليد ايلدى . بو تحولات و انقلابات،  
اراده و اداره بشر فوقنده بر طاقم الجاآت ايله بالضروره ساحه افعاله كن  
سلسله شتوندن بشقه نهدر ؟

ايشته جلى و يا خفى صورتده مكنوز حكم قدر اولان نيجه اسباب  
و عواملك سوق و تحريكيله هنوز بالاطراف ارتساس ايدم ميان سوائقه



تبعاً کونک برنده دولت عثمانیه، کنديني ناورد جهانہ آتيلمش بولدى .  
او ائنادہ جهان حربى بتون دهشتيله حکمفرما ايدى .

اوروپاي غريبده اسويچره حدودى ايله مانش دکزى بيننده  
شعشعلى بر مدنيٲك وجوده کتيرديکى آثار بهترين انواع تخريباته  
اوغرامقده وجهت شرقيهده بحر بالطق ايله رومانيا حدودلرى آره سنده  
اولانجه دهشتيله اجراى تاثيرات ايدمرک هر بولديغنى قهر و افنا ايتمکده  
ايدى . بدايتده سرعتله آلمانلره دوغرى ميل ايدن ابره ظفر، فرانسلرک  
برنجى مارن محاربه سنده قزاندقلى موفقيات سايه سنده آرتق متوازن  
بر حال آلمقده ايدى . مع هذا موت و خرابى صاچان افواه آتش فشانک  
اقطار جهانى آله ولره غرق ايتمک استعدادى کيتدکجه آرتيوردى .

دول مرکزيه، خليفه مسليٲنک کنديلريله متحد اولمسندن مسرور  
و محاصملر متأثر ايديلر ؛ مع مافيه وقايعک تسلسل طبيعيسنه قانع اولنلر  
بو حاله تعجب ايتماشلردر . تاريخ ، نقاط نظره کوره، هر مملکتده  
مختلف طرز لرده يازلمقدهدر . بوندن طولايى تورکيه نك حربيه دخولى  
حقنده کى فکر لرده ، مملکتلره و تمايلات سياسيه يه کوره تخالف ايدر .  
بزه کلنجه : حقيقت حالى تثبيت ايچون تشوشات واقعه نك منشانه  
طوغرى کيتملى يز . وضعيتى ايجه محاکمه ايدم بيلمک ايچون ۱۸۳۲ سنه سنه  
ارجاع نظر ايتمک لازم کليور . او تاريخده سلطان محمود ثانى ، مصر  
واليسى محمد على پاشانک تهديداتنه معروض قالنجه روسيه چارندن  
استمداد ايتمشدى . ايشته اوصرمده حادث اولان منظومه سياسيه نك  
احکامى، کرچه بالآخره فراقفورٲ و برلين معاهده لريله خيلى تحولاته  
اوغرامشسهده، زمانمزه قدر تاثيراتدن خالى قالماشدر .

پادشاهک استمدادينه پترسبورغده تهالکله اجابت ايدلدى . چار



قره دگز بوغازینه بر دونما کوندر و بکقوزه عسکر چیغارتدی. فقط  
 بو حادثه نك غرب عالمده حاصل ایتدیکی تلاش اوزرینه عساكر مخرجه  
 بر آرزو کرم کیری آلمش ایسه ده روسیه، باب عالی ایله تدافعی بر اتفاق  
 عقدینه موفق اولمش و بو اتفاقه نظراً ذات شاهانه حین حاجتده  
 هر هانکی بر اجنبی دونماسنه قارشى بوغازلری مسدود و بو صورتله  
 قره دکزده کی روسیه سواحلی تعرض خارجیدن مصون بولندیر یور،  
 عین زمانده روسیه دونماسی ده بحر سفیده کچه بیلوردی. بو اتفاقدن  
 در حال خبردار اولان پارس و لوندره قاینه لری پک زیاده متأثر اولدیلر؛  
 لکن پرنس مترنیخك توسطی و چار برنجی نیقولانك بیانات مصلحانه سی  
 سایه سنده ۱۸۳۸ سنه سنه قدر صبر ایتدیلر. آنجق اوسنه ایچنده عساكر  
 عثمانیه نك نزیب ده مصر لیره مغلوبیتی پایتخت عثمانی نك یکیدن مخاطره یه  
 دوشسنی انتاج ایتدیکندن، چار برنجی نیقولا وهویغ قاینه سی رئیس  
 لورد پالمستون، متفقاً محمد علی پاشایه قارشى تدابیر قضیه اتخاذه  
 قرار و یردیلر و چار، خنکار اسکله سی اتفاقنك تجدید ایدیلیه جکنی وعد  
 ایلدی. آوستریا، پروسیا دخی انکلتزه، روسیه یه التحاق و تورکیه ایله  
 برابر بو درت دولت ۱۳ تموز ۱۸۴۰ ده لوندره ده بر اتفاق خمس عقد  
 ایتدیلر. اشیو اتفاقنامه مصر و الیسنی صیانت ایدن فرانسه یه قارشى بر مقابله  
 اولدینی کبی محمد علی پاشانك تجاوزاتنه ده سد چکهرک مشارالهی  
 پادشاهك حقوق حکمرانیسنه مراعاته مجبور قیله یور و بو صورتله کرک  
 استانبول کرک چناق قلعه بوغازی دول ممضیه نك تحت مراقبه سنه وضع  
 اولنیور ایدی. فقط فرانسه نك رضاداده اوله مدینی بو معاهده، آز بر  
 مدت صکره فسخ و یرینه فرانسه نك اشتراکیله ۱۸۴۱ ده عقد ایدیلن  
 لوندره معاهده سی اقامه اولندی. لورد پالمستون، سیاسی بر شاه



اثری اولان بو معاهده نامه ایله ، ۱۸۳۲ ده تورکیه - روسیه اتقاقیدن متحصل وضعیت قیغیر ایدوب روسلری قره دکزه حبس و حین حاجتده اورایه کیره بیلیمک امکاتی غرب دونمالرینه بخش ایتیش و پادشاهی بوغازلرک نکهبانی قیلیمش اولیور، و بو صورتله تورکلری روس سیاستیله معارضه دائمه ده بولندیریوردی .

لوندرم معاهده سندن صکره انکلتراهیه استناد ایتیمکه باشلایان باب عالی اوچنچی ناپولیونک تورکیه یه قارشی جمیله کارانه حرکت ایتمسندن ناشی فرانسه یه ده تمایله باشلادی . تورکلرک خصم قدیملری اولان روسلره قارشی قریعده فرانسزلر، انکلیزلر ایله برلکده حرب ایتملری ، اشبو منظومه سیاسیته نک تأید و تتوجی ایدی . روسلرک انهزامنی موجب اولان بو محاربه ۱۸۵۶ ده پارس معاهده سنی انتاج ایتدی . بو معاهده خالصانه و بحق تطبیق ایدلمش اولسه یدی دولت عثمانیه نک ترقی و استقبالی تأمین ایدردی . لکن اوروپا آفاق سیاسیته سی قرارمقده کجیکمه دی . تورکیه یه پک موافق اولان شو وضعیت ، آز مدت صکره علیه نده کی روسیه افسادات و تسویلا نه خادم برحاله کیردی و روسیه نک بحر سفیده تجاوزینه قارشی طور مق و وظیفه سی تک باشنه تورکلره تحمیل ایدلدی . دولت عثمانیه نک روس استیلا سنه قارشی نه بیوک فدا کارلقلرله اوغراشوب نه قهرمانانه فقط بی فائده غیرتلرده بولندیغنی کیم بیلیمز ؟ نه فائده که بو فدا کارلقلردن ، بو غیرتلردن استفاده ایدن آوروپا ، مقابلنده هیچ بر اثرمنت کوسترمیدی . و تورکیه یاپدقلرینه قارشی فلا کتدن ، پارچه لانه لاندن بشقه بر مکافات کورمیدی ! حتی کوزلرینی شماله دیکمش اولان باب عالی ، آفریقاده تافسدن بحر احمره و خط استوا یه قدر ممتد اولان ممالکنک ، برر بر



آلندن چیقدیغنی کورییور، فقط حال انهدامده بولنان بر استاتوقو و تمامیت ملکیه وعدلریله آوودیلقدن خالی قالمیوردی .

بو قدر واسع سواحل و حدودی ایله عثمانلی ایمپراطورلغنی مدافعه ایتمک کوجدی . اوندن بشقهده غیر متجانس اهاالیسنک نصفی مدافعه وطندن مستغنی، حتی وطن علیه ساعی ایدی؛ اجانبه بخش امتیاز ایدن عهد و عتیقه سایه سنده تجارت اونلرک الله کچمش و هر درلو حمایه قانونیه دن مهجور قالان فعالیت صناعیه ، فلجه اوغرامشدی ؛ اقتصاداً مسابقه ایچون هر درلو سلاحدن محروم و هر درلو مقابله بالمثلی مانع معاهده لر یوزندن نامحدود صویغوونجیلغه معروض قالان تورک، هر کون دها زیاده فقیر دوشیور، هر کون دها زیاده سفالته دوغری سور و کلنه یوردی ؛ حکومت عثمانیه ایسه ، اجانبک بار مطالبی آلتنده ازیلیوردی .

بوندن قرق بش سنه اول آوروپای عثمانینک قسم اعظمی سلطنت سنیه عالمیه آیاقلان دیران پانسلاویست فساداتی ، بربری متعاقب ظهوره کلن قره طاغ ، صربستان روسیه محاربائی ، واک صکردهده بو عصری اهل صلیب هجوملرینه موقتاً فاصله چکن برلین معاهده سی، آتیا وقوعه کله جک دها آلم حادثاته برر مبدأ اولدی . آرتق تورکیه نک اورتهدن قالقمسی وقت مرهونه معلق بر مسئله حکمنه کیرمشیدی .

سلطان عبدالحمید ثانی بو نتیجه مو حشه دن تحفظاً حقلرنده مخادنت پرورده ایتدیکی فرانسزلر ایله عقد پیوند موالات ایچون ۱۸۷۹ ده مراجعتده بولندی . لکن فرانسزلر آلمانلردن اخذ ثار فکرینه صاپلانمش اولدقلرندن خاقان مشارالیهک تکلیفنه روی قبول کوسترمه دیلر؛ زیرا روسیه یه تمایله باشلامشلردی .



انگلیزده لورد بیقونسفیلد، برلین قونفرمسی اثناسسند تورکیه یه خیلی میل کوستریوردی؛ فقط اونی استخلاف ایدن غلادستون قاپینه سی عثمانلی ایمپراطورلنی حقننده امید و امنیت ویره جک برماهیت ابراز ایتیموردی. بو حالاردن مایوس اولان پادشاه، آلمانیا یه عطف انظار ایتدی و استانبول ایله برلین آرمسند بر جریان سیاسی باشلادی. اوزمانلر آلمانیا ذروه اقباله واصل و بو دولته مقارنت تورکیه ایچون فائده یی حاصل ایدی. فقط انکشاف فوق العاده سندن طولانی آلمانیا جهانک انظار غیظ و حسدنی جلب ایدیجه تورکیه نکه ده تهلکه یه دوشه جکی استانبولجه تخمین ایدیه میوردی.

برلین معاهده سندن صکرم بررنک دیکر کسب ایدن تشوشات شرقیه، استانبولده بتون معناسیله بیوک بر حکمدار ورجاله احتیاج کوستریوردی؛ فقط بونلر بولنه مادی. وقایع ده عثمانلی ایمپراطورلنک سرعته سقوطنی موجب فلاکتلر تولید ایتدی؛ نهایت ایش ۱۹۰۸ ده کی او معهود ره وال ملاقاتنه منجر اولدی. اوزمان تورکیه ده برعکس العمل وجوده کله رک مشروطیت طرزنده تیلر ایدن انتباه ملی سلطان عبدالحمیدک اداره مستبد سنه نهایت ویردی.

مع مافیه استحصال اولنان نتایج، مرض مزمنه دواساز اوله میهرق اوپله وقایعه باعث اولدیکه بونلر بنیه دولتی اساسندن صارصدی. ۱۹۱۱ و ۱۹۱۲ محاربه لری طرابلس غربک، آطه لر دکزینک وروم ایلینک ضیاعیه نتیجه لندی؛ بقیه ممالک حقننده ده آوروپاچه انواع منویات پرورده ایدیه رک مناطق نفوذ تقسیمی موضوع بحث اولدی. فقط بو بدخواه لقلر، بو خصومتلر هپ بزم کندی افعالمزک، کندی سیئاتمزک جزاسی ایدی.



تورکیہ، کرک اجتماعی، کرک سیاسی علی العموم پک غریب و تہلکہ کلی بر حالہ بولنہ یوردی. عثمانی ایمر اطور لئی، اون طقوز نجی عصرک نصفہ قدر احتیاجات عصریہ ایلہ طابان طابانہ ضد دوشن اکثر مؤسسات و عنعناتی مکباً محافظہ ایتکده و بغير حق شریعتہ عطف ایدیلن بر تنکی نظرلہ، کہنہ اصول و احکام عتیقہ خارجہ حیقہ مامقدہ ایدی.

حکمدار خلافتینامہ ایلہ باب عالی یہ کلنجہ: عصری اصلاحاتہ توسل خصوصندہ پک محترز و احتیاطکار طاور انمق و دائماً کروہ متعصینک مخالفتنی کوز تمک ضرورتندہ ایدیلر. بناءً علیہ ہر جہتی حسن ادارہ ایلہ ایش کور مکدہ کی مشکلات، کرکی کبی اصلاحاتہ مانع اولمقدہ و بوحال، ترقی پرور رجال عثمانیہ ایچون دہ حقیقتہ یأس آور بولنمقدہ ایدی.

اساساً تورکیہ دہ بولنان صنوف اہالی باشلیجہ کویلولرلہ علما و مأموریندن عبارت اولوب اجتماعی و اقتصادی اہمیتی حائز دیگر بر صنفک همان همان بولونماماسی، تشکلات اجتماعیہ نقطۂ نظرندن تورکیہ نی ممالک سائرہ یہ نسبتہ پک دون و نامساعد بر موقعدہ بولندی ریوردی.

فی الحقیقہ آوروپادہ و قلیلہ زمام ادارہ، آزچوق عین دین، عین مدنیت ایجاباتنہ تابع اصیلزادکان ویا آریستوقراسی صنفہ منسوب رجال اُلدہ ایدی. بوکا مماثل تشکیلات اجتماعیہ دن محروم اولان تورک دارالاسلامی، آوروپا جماعت خرستیانیہ سنجہ دائماً بیانجی کورلدی. وقتاکہ آوروپادہ خلق حکومتلری تأسس ایتدی؛ صنوف متوسطہ دن محروم اولان تورکیہ، غریبک بو خصوصندہ کی انکشاف و انقلابی تعقیبہ مقتدر اولہ مادی، انحلال آور عنعنات ایلہ مخلوط بر مطلقیت اداریہ یہ صاپلانندی قالدی.

الیوم آوروپادہ سرمایہ ایلہ سعی آرہ سندہ کی اختلافاتدن منبعث



بولنان سوسیالیستك ، اداره حكومتده كندینه عائد اولان حقوق هر یرده طلب و دعوی ایتكده در . عهد عتیقه ایله باغلی و صنعت و ثروتدن محروم بولنان تورکیه ، بتون دنیاچه حکمران اولوب بین الملل تساندر ایجاد ایدن احوال و عوامله قارشى پك ییانی قالمشدر . بنابراین بوتون بو نقایص و تأخراته آوروپالیر طرفندن کیتدکجه دهها ماهرانه جوریلن تجاوز دولابری و حرص و طمعله آلوده تشبثلرده منضم اولونجه تورکیه کندیخی مدافعهده ، برچوق مشکلاته اوغرادى . ایشته بوکى چاره سز لککر ایچنده بولنان دولت عثمانیه غرب عالمه تمثیل ایدرک ۱۹۰۸ ده پارلمانه بر اصول اداره قبول ایتدی ؛ لکن بو انقلابده مسعود بر نتیجه ویرمدى . طرز اداره و سیاستی بر سلسله خطیاتدن عبارت اولان سلطان عبدالحمیدك خفیهك و اعتسافلرله مالی اصول سقیمه سنه کنج تورکیهده کندیخی قایدردى . زیرا نهال مشروطیتی امراض طفولتدن تخلیص ایچون لازم کن واسطه وزماندن محروم اولان کنج تورککر ، اداره مصلحت پولتیقه سنه توسل ایدوب ۱۹۱۱ دن اعتباراً حربدن حربه آتیلدیلر . اداره داخلیهده مرکزیت اصولی قبول و ماجرا پرستانه بر سیاست تعقیب ایتکله باشلادیلر . ملیجیلک کوزه دن بوکنجلر ، امور خارجیهده دخی - داخلی سیاسترینک مقتضیاتندن اوله رق - آلمانیايه تمایله مجبور قالدیلر . اوتایل دولت عثمانیه یی حفره انهدامه سور و کلهدى . فی الحقیقه تورکیه نك دول مرکزیه ایله متفقاً جهان حربنه قدر سور و کله سی استقلال و حاکمیتنی تهلککيه القا ایتش و کندیسنی دول معظمه عدادندن چیقارمشدر ...!

عثمانلی ایمپراطورلغنك ، اون سکنرنجی عصر دن اعتباراً اسکی شان و شوکتی بر کوالکهدن عبارت قالمش و سطوت عسکریه سنك

سقوطیله بو کولکده کوزدن نهان اولمش ویرینه، کوچلمش، فقط حقیقی  
 بر قوت قائم اولمشدر که اوده : اصل تورکیه ، یعنی آناتولی در.  
 بوسبوتون بشقه بر روح رزینه مالک اولان بوفدا کار آناتولی  
 ایسه ، فلاکت زمانی ذلت و خشوع ایله سرفرو ایتکدن بشقه بر چاره  
 خلاص تصور ایدمه میان کهنه پیرانسیک مقرر سلطنتندن قوپان ریاح  
 متفسخه یه رغماً عنایت الهیه دن امیدنی کسمیه رک استیلای اعدایه قارشی  
 اوز وطنی قانیله، جانیله مدافعه ایتدی، جهاد وفدا کاریده ثباتی فریضه  
 حمیت و اسلامیت بیلهرک ملتک طالع معکوسسنه مقابل صفوف آهنینی  
 سپرایتدی . ایشته تورک ملتی دشمن آیاقلری آلتنده تلویحی قصد اولنان  
 خاک پاک وطنی خون مبارکیله تطهیر ایتدکن صکره، نهال طالعنک تمیسنی  
 لایزال بر ایمان ایله لطف آلهیدن بکلمکده در .





## برنجی فصل

### استامبول اید بوندرام مناسباتی

ایکنجی فریدریق و دولت عثمانیه — سلطنت سنیہ نک خصامی ایلہ پروسیانک  
مخادتی — بارون موفلینغ وادرنہ مصالحہ سی — هوہنزولہرن لرایلہ رومانوف ل  
پینندہ مصاہرت — پروسیا محافظہ کارلری و روسیہ — قریم بحارہ سی  
ہنکامندہ پوتسدام و پترسبورغ پینندہ تساند — کسب سطوت ایدن  
پروسیایہ قارشی حسود روسیہ — فرانسر ، روس تمایلاتی — بيسمارک  
اصول سیاستی — آلمانیانک اتفاق تہلکہ سنہ معروض بولنسی — دولت  
عثمانیہ ، احتراصات و تعویضات زمینی — تورکیہ ایچون آلمان سیاستنک  
مہالکی — سلطان عبدالعزیزخانک اوچنجی نایولیونہ معاونت عسکریہ تشکیلی —  
شرقدہ فرانسنہ نک عنعنوی منافعی — عالی پاشانک مطالعاتی — انکلتزہ نک  
وضعیتی — تورکیہ ایچون فرانقفورت معاہدہ سندن متولد مخاطرات — بيسمارک  
ہمتیلہ روسلرک بحر سیاہدہ تکرار دونما انشاسی — آوستریانک جنوبہ تحویل  
وجہہ ایتسی — بيسمارک برلین قونفرہ سندن کی وضعی — بيسمارق روس  
سیاستنک بیوک فریدریق دستورلرینہ توافقی — شانسلیہ نک نظرندہ تورکیہ نک  
عسکرلکجہ فائدہ سی .

جالس اورنک خلافت اولان عثمانلی پادشاهی ایلہ جہان حربی  
مبادیسندہ عقد اتفاق ایتک ، پانچرمانیستلرک انظار اشتہاسی اوکندہ  
پک واسع ، فقط سراب آسا افقار آچشدی . واقعا دنیانک ہر طرفہ  
منتشر یوزبیکلر جہ اہل اسلامک مادی ، معنوی مظاہرتی ممکن



التأمين اولسهيدى ، عسكرى و سياسى ميزان ، آلمانيا ايچون البته  
 آغير باصاردى . جرمن خيالپرستانى مياننده برتورك - آلمان اتفاقى  
 قدر طبيعى و حال و وقتە مناسب برشى اوله ميه جفنى ، زيرا صيقى  
 بر مقارنت آرزوسى بيوك فريديريك زماننده بيله مضمر بولنديغنى  
 سرد ايدنلرده اكسيك دكل ايدى . فى الحقيقه يدى سنه محاربه سنده  
 ايكنجى فريديريك عقيشديران متعدد خصما آره سنده توركلرك ايكي  
 خصم قديمى ، يعنى آوستريا و روسيه ده موجود ايدى . بناء عليه  
 پروسيا قرالى كرك پادشاهدن ، كرك تابعيت عثمانيه ده بولنان قريم خانلغندن  
 استمداده توسل ايتمشدى ؛ لكن فريديريك دوستى و پرستشكارى  
 اولان اوچنچى پهره ك روس تخته جلوسى پروسيانك وضعيت عسكريه  
 و سياسيه سنى قورتارمش و قرال ده آرتق سلطنت سنيه ايله اتفاق  
 فكرندن صرف نظر ايتمشدى . مع مافيه برلينده آوستريا عليه اولمق  
 اوزره روسيه ده داخل اولديغى حالده دولت عثمانيه ايله براتفاق مثلت  
 عقد ايتك تصورلرى اكسيك دكلدى . چونكه پروسيالير غربه قارشى  
 تماميله سربست قالمق ايسته يورلردى ؛ آنجق چاريجه ايكنجى قاترينك  
 ممالك عثمانيه حقنده كى حرص استيلاجويانه سى بويله براتفاقه منافى  
 ايدى . بوندن بشقه ايكنجى فريديريك لهستان مقاسمه سنى انتاج ايليان  
 سياستى تورك منافعى ايله صريح بر صورتده تضاد تشكيل ايدى يوردى .  
 ايكنجى فريديريك خلفى اولان ذكا دوشكونى ايكنجى فريديريك  
 ويلهلمك دور سلطنتنده پروسيا ايكنجى و اوچنچى لهستان مقاسمه لرينه  
 اشتراك ايتدى و پترسبورغ ايله حسن مناسباتده بولندى . او زمانكى  
 اختلاجى فرانسه اوزرينه يورومك ايچون توركلرك دشمن قديملىرى  
 اولان آوستريالير له برلشدى . آرتق برلين ، پترسبورغ ، و يانه آره سنده كى



مناسبات ۱۸۱۳ ده ناپوليون عليه بر اتفاق مفرس عقد ايديله جك  
 در جهده تبلر ايتمشدى . بو اتفاق ، آندن يكرمى سنه صكره - افكار  
 حرارانه واختلالكارانه يه قارشى مقاومت ايتمك اوزره - تجديد اولنوركن  
 دولت عثمانيه له و مجار ملتجيري مردهانه حمايه وعالم مدنيت قارشى  
 ابراز عدالت ايديوردى . صكره لرى ، يعنى ۱۸۷۲ ده بيسمارق ، منافع  
 عثمانيه يى مغل اوله حق صورتده بالقانلرده كى روس و آوستريا اختلافاتنى  
 تاليف ايجون ، برنجى ويلهلمك توسطيله ، او اسكى اتفاق مفرس -  
 مماثل يكي بر اتفاق عقدايتمك مجبوريتنده بولندى . برلين ايله پترسبورغ  
 بيننده كى عنعنوى روابطه ، آلمانيا شانسليه سنك ۱۷ شباط ۱۸۷۹ ده  
 - غره نچ بوتن Grenz boten غزته سنه درج ايديله جك بر مقاله دن  
 طولايى كندى قلميله موسيو بوش Busch ه يازديغى بر كاغده :  
 ۱۸۲۸ ده روسلرى توركلره قارشى اولان حربلرنده مشكلات دن  
 قورتارمق ايجون - مثلاً موفلينغ Müffling ي كوندركم كى - واقع  
 اولان خدماتمز معلومدر . « ديوب او حرب اثناسنده ادرنه يه قدر  
 ايلرلك جراتنده بولنان مارشال دى بيج Diebitch قومانداسنده كى  
 ضعيف روس اردوسنك وضعيت مهلكه سنه اشارت ايتمشدى . اوزمان  
 عددآ فائق اردولر مز آره سنده قالب بيتاب ومهماتمز بولنان روسلر ،  
 اكر استانبولده كى پروسياسفيري بارون موفلينغ مداخله سى اولماسه يدى  
 انهمزه اوغرامق تهلكه سنده ايديلر . سفيرك معاونتى سايه سنده روسلر  
 ضعفلرني ستره موفق اوله رق ۱۸۲۹ ده غالبانه دينه جك بر مصالحه بيله  
 عقد ايتديلر . غريبدركه بوندن طولايى كنديسى پروسياسيه متتدار



فرض ایدن سلطان محمود ثانی پروسیان عسکری معلمر جلی ایچون  
اوچنچی فریدریق ویلهلمه مراجعتده بولمشدر . (۱)

خاقان مشارالیه کی حفیدی عبدالحمید ثانی ده بیسار قک برلین  
قونغر سنده خیر خواهانه توسطده بولندیغی زهابنه دوشمش و بو ذهاب  
باطل اردوسنک تنسیقی ایچون کندیسنی برنجی ویلهلمدن آلمان ضابطانی  
ایستمکه سوق ایتمشدر . اونو تیهلم که چار برنجی نیقولالا ۱۸۲۸ ده پروسیانک  
عرض ایتدیکی خدمت برکزیده یه مقابل قان پدري اوچنچی فریدریق  
ویلهلمه ادرنه نك آناختارلرینی کوندرمشدی . بو آناختارلر ، الیوم  
برلین عسکری موزمسنک تزیناتی جمله سندندر .

ایشته بر دیگر محارب شهرک ، یعنی اسوچ قرالی دمیرباش شارلک  
وقتیله یاپدیغی کی بیوک فریدریقک موقت بر مجبوریته تبعاً عثمانلیلردن  
استمدادده بولمنسی کیفیتی استثنا ایدیلنجه پروسیانک وضعیت وعلاقه سی  
کندیغی تورکیه نك دشمنلری اولان روسیه و آوستریا طرفه سوق  
ایتدیکی کوریلور .

رومانوفلرک منشأندن و آلمانلرله اولان قرابتلرندن اوزون اوزادی یه  
بحث ایتمکه لزوم یوق . یالکزشونی بیلملی که چار برنجی نیقولانک زوجه سی  
برنجی ویلهلمک همشیره سی اولدیغندن یاقین وقتلره قدر پترسبورغ و برلین  
سرای حکمداریلرینک مناسباتنه بوسهریتک پک بیوک بر تأثیری اولمشدی .  
ذاتاً برلینده زمام اداره محافظه کارلر النده بولندجه ترجیحاً روس سیاستنه  
توسل ایدیلیوردی . زیرا بوفرکه چار حکومت مطلقه سنی غربک  
(۱) پروسیا قرالتک چاردن بعد الاستمزاج - کوندردیکی ضابطان میاننده  
مارشال مولتکه دخی بولنیوردی .



احرارانه واختلاجویانه تمایلاتنه قارشی برسد قوی عد ایدردی .  
بوجهتله کرک قریم محاربه سی هنگامنده ، کرک او محاربه یی انتاج ایدن  
وقایع ائناسنده برلین ، هپ پترسبورغه منجذب بولنشیدی . دردنجی  
فریدریق ویلهلمک باش وکیلی مانتوفل Manteufel مسائل عثمانیه ده  
پروسیانک هیچ علاقه سی بولنمدیغنی سویلردی . دیگر آلمان حکومتلری ده  
تمامیله بیگانه ایدیلر .

مع هذا فرانقفورت معاهده سی برلین ایله پترسبورغ آره سنده کی  
مناسبات ودادیه یی که وشتمک اوزره ایدی . پروسیانک دانیمارقه یه  
و آوستریایه قارشی احراز ایلدیکی غلبات سایه سنده سرعتله تعالیسی روسیه نک  
انظار حسدینی جلب ایتدیکی بر صر ده ده ۱۸۷۰-۷۱ محاربه سی ظهوره  
کلدی که او محاربه ده اوچنجی ناپولیونک مغلوبیتی هو هنزولرن خانداننک زیر  
سطوتنده آلمان وحدتنک حصولی انتاج ایلدی . بو کیفیت ، کندیخی الک  
برنجی دولت عد ایدن روسیه نک غرور وحشمتنه پک کران کلدی .  
چونکه رومانوفلرک هو هنزولر نلره قارشی پرورده ایتدکری مخادنت ،  
روس چارینه سرفرو ایتمه لریله مشروط ایدی . (۱)

سرای محافلنده وپانسلاویست محیطنده خیلی منتشر بولنان فرانسز  
لسان و عرفانی ، روسیه ده فرانسه یه تمایلات پرورده ایدیلمسینه سبب  
اولیوردی . مغلوبیتلرندن متولد فلا کتله طولانیسیله بومیل ومخادنتک  
تجدد وتایدندن فرانسزلر ، آلمانیای قوشاتمق ایچون وضعیتی غایت مساعد  
بولنان چار دولتیله تأسیس مقارنت خصوصنده استفاده ایتدیلر .

(۱) « برنجی نيقولا، پروسیای روسیه نک پیکی اولمق اوزره ضعیف حالده  
کورمک ایستردی . » ( فون یاغوودن مترجم Ursachen u. ansbauch  
des Welktieges صحیفه ۱۲ . برلین ۱۹۱۹ )



وقایعی اولدن کوروب شتونی موافق بر بحرایه سوق ایلمکده پک ماهر  
اولان بیسمارق بومقارنت تهلیکه سنی منعه وقف نفس ایدم رک اغبرارندن  
چکندیکی روسیه قارشى رضا جویانه برمسلك تعقیب ایدردی . بوم  
باشلیجه شرقه عائد خصوصاً تدم تورکیه علمینده کی مسقف منویاتنه  
مماشات مسلکندن غیرى برشی دکلدی .

ایشته فرانسه یی حال تجردده بولندیرمق بیسمارقک اک بویوک  
غایه سی اولدیغندن روسیه یی اوقشامق و قابل اولدیغی درجه ده روس  
منافعنی ، آوستریا وانکلتره منافعنی ایله تألیفه چالیشمق بویکی دولتی ده  
آلمانیا یه بند ایتک ، بیسمارق سیاستک محرکی ومداری ایدی .  
آتی یی هر خصوصده دور بینانه کورده بیسمارق ، ایتالیا ایله ده  
مقارنت حصوله و بناء علیه ، آوستریا علمینده ایتالیا ده پرورده ایدیلن  
ایرره دانتیزم irredentisme یعنی آوستریا ایتالیا نلرینک استخلاصی  
خصوصنده کی امللرک تخفیف و ازاله سنه ده چالیشیوردی . تورکیه یه  
کنجه : عننده بومملکت ، بر زمین تعویضدن عبارت ایدی .

پروسیانک زیر سطوت و تفوقنده مؤسس و بردوام اولان آلمانیا  
ایمپراطورلغی ، طالع پیشنده خطرناک یوللرم صایمقدمه تهالک کوسترمیش  
اولسه یدی ، در حال علمینده وقوعه کله جک اتفاقلردن طولانی تهلیکه لرم  
معروض بولنه جغندن تمامیه کسب قوت و رصانت ایتمه دن اول بوکنج  
ایمپراطورلق ایچون اوکی تهلیکه لری بر طرف ایتک ایلك آلمان شانسلیه سنک  
اسالاساس سیاستی ایدی . بوسیاست ، سفینه دولتی نه شرقده ، نه ده  
غربده قایایه چارپدیر مامقدن و تهلیکه کوز اوکنده طورورکن ، سمت  
بعیده مدنظر ایتمه مکدن عبارت اولوب بیسمارق بونی یوکسک کیاستیه  
تطبیق ایتدی ولزوم کوردیکی وقت تهلیکه لی اورتاقلرینه ممالک عثمانیه دن



بول كېسەدن حصەلر كوسترمكده تردد ايتىدى . بوسورتله فرانسىيى  
 آووتوب اخذ ئار فكىرنەن واز كېرىمك و ايتاليا منافعيله چارپىشىدىرمق  
 اېچون فرانسىزلى سىلعتى عثمانىەنك برايات ممتازەسى اولان تونس  
 حقنەدىكى منوياتىندە تشجىع قىلدى . بواغفالكار مەاملە بر آرزو كەرە  
 بحر سفىد موازەنە سەنەكلى مقىياسدە تاثير ايتىمكە بويوك انقلاباتە بادی اولوب  
 بالاخرە مصر ك انكلىزلى طرفندىن اشغالى استىزام ايتىش و ايتاليانلرك  
 طرابلس غرب حقنەدىكى احتراضلرىنك تشددىنى موجب اولمشدر .  
 بېسمارك بوسىياسى دولتەلىەنك انقسام واضمحلال تخملىرىنى صاحىقەدە  
 ايدى . سىنىور قرىسىنىك خاطر اتىندە ، عثمانلى طوپراقلىرىدىن دوستلرىنە  
 پىشكشنىر چكىمك خصوصەندە بېسمارك سەاحتەنە دائر بر بشقە نمونەدە  
 كوريلور كە اودە ايتاليا باش وكىلىنك ايررە دانتا امللىرىنى تسكىن اېچون  
 كەندىسە ۱۸۷۷ دە تعویضاً آرناوودلىكى تەكلىف ايتىش اولماسىدر . لىكن  
 او ائشادە آرناوودلىق قرىسىنى تەطمىنە كافی كەلە يوردى .

يالكىز عسكىرى تدبىرلر و ناقص سىياسىلر ايله مدافعەسى مستحيل  
 اولان ممالك عثمانىە ايسە اوصىرەدە اودر جە واسع و طاغنىق و احتوا ايتدىكى  
 اقوام و عناصر اوقدر متخالف و متباين ايدى كە حدودلىرىنك محافظەسى  
 و وحدت مليەنك تاسىسى عدىم الامكان دىنە جك بر حال دە ايدى . بوندىن باشقە  
 دىن و مدنيت جەھتيله اوروپايە بوس بتون يىبانجى بولنان دولتەلىە ، قطعات  
 ثلثەدە مالك اولدىغى ائشها آور منابعيله متادياً خرستيان دولتلىرىنك  
 احتراضاتنى جلب ايتىمكە و آنجق بونلرك رقابتندىن مەحصل موازەنە  
 قوا ساىە سەندە تاامىن موجوديت ايتىمكە ايدى . ايلك زمانلرىندە شرق  
 ايشلرىنە علاقە دارلقدن اجتناب ايدى بېسمارك آلمانىاسى ، موقعى تەكلىم  
 اېچون بورقابتلردىن استفادە فرصىلرى آرامايە قويولدى . آلمانىا دولت



جدیدہ سنی شرق ایشیائینہ قاریشدیرہ رق بواسطرقاباتی آلمانیاہدہ  
تشمیل ایدن ، ایمپراطور ایکنجی ویلہم اولدی . جرمانیزم مسئلہ سی  
شرق دعواسیلہ گرفت اولمغہ باشلادیغندن وضعیت باب عالی ایچون غریب  
بر صورتہ مشوشیت اکتساب ایلدیکہ آلمانیا تورکیا ایچون حقیقی بر  
تہلکہ عرض ایتدکہ ایدی .

فی الواقع اوروپاچہ آلمان نفوذینک شرقدہ انتشارینی منع ایتک  
وہو نفوذک عواقب مہلکہ سنی تحدید ایتک لزومی حاصل اولدی . حتی  
سلطنت عثمانیہ نک مقدراتی ایدی تصرفدہ بولوندیران دولتر نہایت  
مقاسمہ سنی بیلہ دوشونمکہ باشلادیلر . بناءً علیہ شرقدہ آلمانیا نک  
متعدی سیاستی دولت عثمانیہ نک انحلالنہ بادی اولہ بیلہ جک برماہیت  
آلدی . بو حال ، ادوارد دریولت Edouard Driault ک «فرانسہ نک  
عنعنات سیاسیہ سی و صلح شرائطی» نام اثرندہ ایضاح ایدلمش و مصرک  
وقتیلہ انکلترہ طرفندن الحاقنہ وایتالیانلرکدہ طرابلس غربہ تجاوزینہ  
فرانسہ نک موافقتی ، آنجق برکون اولوب فرانقفورت معاہدہ سنی فسخ  
ایتدیرہ بیلیمک فکرینہ مستند بولندیغی اثبات اولمشدر . فرانسہ ایلہ  
انکلترہ نک پانسلاویست پولتیقہ سنہ قارشی - روسلرک استانبول حقندہ کی  
امللرینہ موافقت ایدنچہ قدر - مماشادہ کوسترملری دہ ، مؤلف مومی الیہ  
کورہ ، آلمانیا نک جنوبہ طوغری اقتصادی و سیاسی انکشافنہ مانع اولمق  
مقصدیلہ وقوعبولمشدر .

۱۸۷۰دہ کی فرانسز - آلمان محاربہ سی باشلادیغی وقت جنتمکان  
عبدالعزیزخان - آتیا ممالک محروسہ اوزرینہ یاغہ جق اولان باران بلایی  
کشف ایدرجہ سنہ - اوروپا موازنہ سنک عامل اساسیسی عد ایلدیکی  
فرانسہ نک دونکلکترینہ رغماً اوچنجی ناپولیونہ معاونت تکلیفندہ



بولونمیشدی. سرکیء عمومینک کشادی مناسبتیه پارسه سیاحت ایدوب  
 قوبلائس طریقیه عودت ایلان خاقان مشارالیه پروسیا اردوسنده مشاهده  
 ایتدیکی انتظام فوق العاده یه حیران قالمیشدی. بنابرین او چنجی ناپولیونک  
 مغلوب اولمسندن اندیشه ایدهرک تلغرافله اتفاق و معاونتنی تکلیف وهان  
 بر اردو جمع واعزام ایده جکئی اشعار ایلوب اناتول سواحلنده کی  
 عساکر ردیفه یی تحشیده باشلا تمشیدی. فقط پادشاهک بونیتی قومه دن  
 فعله حقیقه دن، فرانسز اردولری هزیمته اوغرادی و فرانسه ایمپراطورلغنه  
 مدفن اولان سهدان Sedan اسارتی وقوعه کلدی. ایشته ۱۸۵۶  
 سنه سنده پارس معاهده سنک تنظیمنده عامل اولان فکری تمامیه قلع  
 ایدن بو کیفیت اولدی. و آلمانیا نک مظفریاتی چار اردولرینه استانبول  
 یولنی آچدیردی.

فرانسه نک شرق سیاستی اختلال کیردن اعتباراً مهم تغیراته  
 اوغرامشدر. حکومت مذکوره سلطنت سفیه ایله مناسباتنده علی الاکثر  
 ایکی مختلف یول تعقیب ایدیوردی. بری دولت علیه نک آفریقا و سوریه ده کی  
 ایالاتنه، دیکری اقسام متباقیه سنه عاڈ اولوب منافع عثمانیه یه دائماً  
 منافی ایدی.

اون طقوزنجی عصر او اسطنه طوغری فرانسه نک مصرده نفوذی  
 صولک درجه یه وارمش و جبل لبنان ایله سوریه ده زیر حکمنه کیرمکه محکوم  
 براده یه کلشیدی. بوقطعاتک شمالده قدیم لاتین مدنیتته مهدانکشاف  
 اولان نظریه آطه لردکزی سواحلیله جزائری وشاعر ضریرک داستان  
 سرا اولدینغی وقایع قهرمانه یه صحنه ظهور اولان شهور و قصباتی ده، اوزمانک  
 شعر پرست و مفتون خیالات فرانسه سی اوزرندم فسونکار تأثیردن خالی  
 قالمایوردی.

ایشته اوچنچی ناپولیونک تحت ایمپراطوری یه جلوسیله - بدایتی اهل صلیب دورینه قدر واروب الڤولک صفحاتی بوناپارط اردوسنک نیل وادیسند و سوریهدہ کی حرکات فتوحاتجویانہسی تشکیل ایدن - شرق سیاسی عنعناتی یکیدن جانلاندی .

آلبر واندال AlpertVendal ، قدیم فرانسه نك شرقده کی عنعنوی علاقہ و منافعی شوصورتله تلخیص ایتشدہ ؛ « فرانسه ، باب عالی ایله اولان مناسباتی سایہ سنده ، اردوی عثمانی بی خصمانسک هجوملرینه قارشی استعمال ایدہ بیلردی ؛ تورکیہ ده متمکن قتولیکلرہ تأمین ایتدیکی حمایہ ، خرستیانلق عالمنده کنڈیسنی یوکسلتیردی . مناسبات تجاریہسی ایسہ کنڈی رفاهنی مؤمن اسبابدن معدود ایدی . »

بو حقایقی تقدیر ایدن برنجی ناپولیون ، سلطان سلیم ایله تأسیس ایتدیکی حسن مناسبات سایہ سنده تورک اردولرنی ۱۸۰۶ ده محارب بولندیغی روسلرہ قارشی حرکت ایتدیرمکہ موفق اولمشدی . یارم عصر صوکرہ اوچنچی ناپولیونک سقوطنی تسریع ایدن احوال فجیعہ وقوعہ کلمہ ایدی ، آلمانیاہ قارشو فرانسه ینہ ، تورکیہ نك برنجی فرانسوادن بری بلاعوض ابراز ایتدیکی معاونت عسکریہ دن استفادہ ایدہ بیله جک ایدی . اوچنچی ناپولیون ، ممالک عثمانیہ ده متمکن قتولیکلرک حمایہ سنی فرانسه یه بخش ایدن معاهدات عتیقہ دن بالاستفادہ شرقده خرستیانلق عالمنده کی نفوذنی اعلاہ چالیشدی . بوندن طولانی ، اورتودوقس کلیساسنک مغرور حامیسی برنجی نیقولا ایله آرم لرنده حاصل اولان غیض و برودت ، قریمده بوی اولچوشمہ لرینہ سیبیت ویردی .

والحاصل ایکنچی فرانسه ایمپراطورلنی و قتیله برویلنو Villeneuve ک



بر بونه وال Boneval ك ملهم اولدقلى سياسته توسل ايدەرك قاردينال  
فلورى Fleury نك :

« دولت عثمانیه نك حدودلرینی محافظه کیفیتى فرانسە پولتیقه سنك  
غایه سیدر. » دییه توصیف ایتدیكى اساساته رجوع ایتك ایسته مش ایدی.  
۱۷۷۱ ده اون بشنجی لوئینك ضابطانندن بارون طوط tott ، الفینستون  
Elphinston ك قوماند ایتدیكى یونان عصاتی دونماسنه قارشى چناق قلعه یی  
مدافعه ایدرکن ینە بو پولتیقه یه توفیق حرکت ایلور و ۱۸۰۷ ده  
انکلیز دونماسی استانبولی تهدید ایچون چناق قلعه بوغازینی کچنجه  
جنرال سباستیانى Sebastiani نك پایتختك مدافعه سی استحضاراتنه  
اشتراکی ده ینە عینی مقصده خادم بولنیوردی .

اوچنجی ناپولیونك شرق سیاستی افکلتزمجه استرقابی موجب  
اولدیغندن ینلرنده ، فرانسز شرق سیاستنه پیرو اولق مجبوریتله ،  
استانبوله قارشو برنفوذ مجادله سی باشلادی وانکلیزلرک ۱۸۵۴ ده قریم  
محاربه سنه اشتراك ایتلرینی موجب اولدی .

سنین وفیره دن بری موجودیتتی بونوع استرقاباتدن متولد موازنه یه  
مدیون اولان سلطنت سنیه نك پولتیقه جه اك پارلاق دوری بودوردر .  
ایکنجی ایمپراطورلق اثناسنده پارس دخی بو موازنه نك مرکز ثقلی  
بولنیوردی ؛ فقط بودور مذهب چوق سورمدی . صدر مشهور  
عالی پاشا ۱۸۶۶ تاریخنده سلطان عبدالعزیز خانه تقدیم ایلدیكى بر  
لایحه ده ، ۳ شعبان ۱۲۸۴ تاریخله یازارکه : « ..... پارس معاهده سنك  
امضاسی قورومقسزین ایمپراطور ناپولیون ایتالیا ده آوستریا نفوذینی  
بیترمك قصدیه اتخاذا ایدەجکی مسلکه روسیه دولتی مخالف  
و آوستریالویه معین بولماق ایچون معاهده منعقدە دن فداکارلق ایتکه

و بزم ضرر مزی و روسیه لوند فائده سنی موجب اوله حق یوللره کیتمه  
و کویا هیچ تعهدلری یوق کبی هر ایشیزه مداخله بی خصوصیه  
مملکتین و صربستان و سوریه و کرید مسئله لرنده دائماً اضرار مزی  
التزام ایلمکه باشلادی و برده « هر قوم ایستدیکی حکمدار و حکومتی  
انتخاب و اختیار ایتک اقتضا ایدر و بر قومه ایستمدیکی بر قوم اجنبینک  
جبراً اجرای حکومته حق اوله مز. » اصول فساد شمولی دخی در پیش  
ایدوب بالعموم اقوام مختلفه نک باخصوص بزم خرسیتانلرک اذهانی کلیاً  
تخدیش و تشویش ایتدی ..... »

اوجنچی ناپولیون سیاستندن فرانسه جمهوریتنه توارث ایلیان  
مسئله ده عینی زمینده ایدی . آلمانیا به قارشو اخذنار حسله رله  
کوزلری قارار مش اولان جمهوریت ، فدا کارلقلرله استرداد ایلیه جکی  
آلساس - لورن مسئله سنی هر دوشونجه نک فوقنده طوتدی .  
اون سکزنجی عصرک اواخرندن اعتباراً بوغازلر مسئله سی ،  
و اوزاقدن ویا یقیندن هندستان یولنه تعلق ایدن بالجمله مسائل ،  
انکلتزه ده شدتلی برعلاقه او یاندر مشدی . و هند یولی اوزرنده بولنان  
ممالک بعیده یه اوزمانلر وضع ید ایده میان انکلتزه ، بو قطعه لرک عثمانلی  
حاکمیتنده قلماسنی اهون شرعد ایدیوردی . مع هذا انکلز شرق  
پولتیقه سی احوال عمومیه یه تبعاً اهمالکار و حتی متلون اولمقدن ده خالی  
قالمدی . بوندن طولانی عالی پاشا ، سالف الذکر لایحه سنده یازمشدرکه :  
« انکلتزه دولتی ایسه برمدتدنبری هر طرف حقنده جاری اولان  
پولتیقه سنی تبدیل برله تجارت و منافعه نه طوغریدن طوغری یه تأثیری  
اولیان مصالحده اصون بیقیدی و بیطرفی طریقه نه کیرمکه و نظامات  
داخلیه سی سربست اساس اوزرینه مبنی اولدیغندن سالف الذکر قومیت



اصولنه مخالفت ایدم مامکله کندیسندن جزوی وکلی معاونت امیدی  
برطرف اولدی .

عالی پاشانک بوشکایاتی موجب اولان عوامله دائر بر فکر صریح حاصل  
ایتمک ایچون پرنس بیسار قک خاطراتنه مراجعت ایدم . (۱) بیسارق  
انکلتزمیه متمایل بولندیغنه وانکلتزمه ایله مناسبات ودادییه پک زیاده  
اهمیت ویردیکنه دائر کندیسنه عطف اولنان مسلکی تصدیق ایله  
برابر انکلتزمه مخادنتنک - صیقجه وقوعه کلان تبدل وکلادن طولانی -  
پردوام اوله مدیغنی بیان ایدر و دیرکه : « هر دولت معظمه نک سیاستی ،  
حادثات و منافع الجاسیه تحولاته اوغرار ؛ فقط بونک خارجنده اوله رق  
انکلیز ملتی هریش سنه ده بر ، کړک عوام قماره سنجه وکړک هیئت  
نظارجه ظهور یافته اولان تحولات موقوتیه معروضدر . »

عالی پاشا ، سلطان عبدالعزیز مرحومه تقدیم ایتدیکی بر دیگر  
لایحه ده یازارکه :

« فرانسه دولتی دخی پروسیه لیلرک دفعه ملک وقوتجه کسب  
وسعت ایلش اولملرندن طولانی دوشدیکی تلاشک اثری اولمق اوزره  
یا روسیه لری پروسیه لیرایله اتحاددن منع ایلک ویا خودممکن اوله بیلورسه  
کندو طرفنه جلب ایچون روسیه دولتنه میل و مناشات کوسترمکه  
باشلا دیغندن . . . . . ایشته بوسطرلردن ده مستبان اولدینی اوزره  
پروسیا لیلرک ۱۸۶۴ و ۶۶ محاربه لریله اکتساب ایتدکری سطوت واهمیت ،  
قریم محاربه سی اثناسنده موقتاً و عوارض طولانیسیله روسیه ایله مجادله ده  
بولنش اولان اوچنچی ناپولیونه ، روسیه نک فرانسه ایچون قیمت  
دائمه سنی خاطرلتمقدن خالی قالمدی ، وتیلزیت معاهده سندن صدره عم

مختشمی روسلرله نصل عقد اتفاقه راغب اولدیسه کندی ده عینی سیاسته سالک اولدی .

ایشته صوک دور سلطنتنده روسلری آوستریا ویا پروسیایه مظاهرتدن منع ایچون پترسبورغه قارشى مماشات پولتیقه سی تعقیباتمک ضرورتنده بولنان اوچنچى ناپولیونک بيله موازنه دولیه ده شاید تورکیه لهنده آز چوق بر قوت تشکیل ایدم بيلمسی امکانی قالدیسه اوده سهدان وقعه سیله افول ایدوب کیتمشدر .

هر حالده کرک عالی پاشانک کرک بیسمارکک سوزلرندن بوذواتک، مسعود دورلرک رجال سیاسیسنه مخصوص فکرلر پرورده ایدم رک، سیاسیاتده مخادنتکار مناسباتک ابدیتنى کورم نلردن اولدقلری آ کلاشیلور. اون طقوزنجی عصرک نصف اخیرنده تحدت ایدن عسکری و سیاسی وقایعه اوروپاده حصوله کلان تحولات ، انکلتزمک تورکیه یه قارشى سیاستنده یکی جریانلر ویرمشدی . فرانقفورت معاهده سی عثمانلی ایمر اطورلغی ایچون بونامساعد تبدلاته باعث اولان اسبابک باشلیجه لرندن ایدی . بومعاهده ، برآلمان وحدتی احداث واوروپانک اورته سندم عظیم برجرمن کتله سی ایجاد ایتمک صورتیله یکی بروضعیت احداث ایدوب پارس ده طوغان موازنه نی آلت اوست ایلوردی . بوندن اک اول مستفید اولان روسیه اولدی : زیرا قره دکزده دونما بولندیرمقدن منع ایدلمش اولان روسیه ایچون بیسمارق ، بومنعوتی درحال الغایه تشبث ایدیوردی . مشارالیه دوستلرندن برینه یازدینى برمکتوبده دیمشدرکه : « بزروسلره بحر سیاهده سربستی تأمین ایتدک . بز اولمسه ایدک ، اونلر بوسربستی نی نه فرانسزلردن ، نه ده انکلیزلردن قوپاره بیلیرلردی . » [۱] تورکیه

[۱] موسیو بوش Tagebuch blätter, M. Busch صحیفه ۵۵۳ جلد ۲

لایپسیغ ۱۸۹۹ (ترجه)



حقننده ، آلمانیا ایمپراطورلغىك وجود بولمىسندن منعبت پك مهم بر  
نتیجه ده آوستریا پولیتقه سنك بالقانلره طوغرى قطعی بر صورتده  
تحویل وجهه ایتمى اولمشدر . توركلر ایچون فلاكت آور اولان  
۱۸۷۶-۷۸ محاربه سنك بر مقدمه سی اولوب راغشتادده عقد ایدی لان  
روس - آوستریا مقاوله سی بو پولیتقه نك مقتضیاتنددر .

اوزمانلر برلین سیاستی ، ۱۸۷۰-۷۱ ده کی خیرخواهانه بیطرفلغی  
اونوتولماش اولان ، روسیه یه قارشى غایت رضا جو یانه ایدی ؛  
نته کیم برلین قونفره سی منعقد اولنجه بیسمارق ، هابسبورغلرک  
وانکلتیره نك منافعی مساعد اولدیغی مرتبه ده روسیه چارینك منفعتی  
محافظه یه غیرت ایتمشدی .

قونفره نك انعقادندن اقدام راینخشتاخ ده جریان ایدن مذاکرات  
اثناسنده بیسمارق ، شرقده آلمانیا نك هیچ بر قصد سیاسی اولدیغی  
و آلمانیا نك ایشده طوغریدن طوغری یه علاقه دار اولان دوست دولتلرک  
منافعی تألیفه حصر مساعی ایده جکنی بیان و آلمانیا نك بو وادیده  
روسیه پولیتقه سنی اخلا لدن توقی ایتمى لازم کلدیکنی علاوه ایدیور  
ایدی . ذاتاً بیسمارق ، عثمانلی - روس محاربه سنك ظهورندن اولده  
دولت عثمانیه علیهنده کی روس منویاتنك مروجی بولندی . معهود  
برلین مه موراندومی ایله دولت عثمانیه یی بوسنه - هر سك مسئله سنده  
کندی حاکمیت و امنیتى ایله غیر قابل تألیف شرائطی قبوله اجبار  
ایتمك ایستدیکی زمان آلمانیا یی روسیه و آوستریا دولترینه تشریک  
ایدیوردی . بو پولیتقه سیله بیسمارق ایکنجی فریدریقک اک صوک  
سیاسی وصیتنامه سنده مندرج افکاره اشتراک ایتمدیکنی کوستریوردی .  
یعنی فریدریقک : « روسیه یی ، دشمن اولمقدن ایسه دوست ایتمک

مرجھدر؛ زیرا روسیه بزه برچوق فسالقر یاپه بیلیر، حالبوکه بز اونک فنالغنه مقابله ده بولنه مایز. « مطالعه سنی تصویب ایدیوردی.

بیسمارک « بتون بالقان مسئله سی پومرانیالی بر نفرک میکیرینه دکمز! » قول مشهوری، اونک شرقه دائر اولان سیاستنی اکلادیر و روسیه آلمانیایه قارشى بر وضع تهدیدکار آلمانجه اونک حقنده آلمانیانک اتخاذایده جکی مسلك موالاتپورانه نی ایضاح ایلر. مشارالیه ۱۲ تموز ۱۸۸۷ ده کی بلغار قاریشقلنی ائناسنده ده رایخشتاخده کی بیاناتنده آلمانیانک شرق ایشلرندن طولانی روسیه علیهنده هیچ بر وقت حربه قالدیشیه جغنی اعلان ایدیوردی.

بیسمارک، خاطراتنک صوک فصللرنده شرق ایشلرندن بحث ایدرکن غایت متیقظانه حرکت ایدلمسنى و روسیه نی انکلتراهله قارشىلاشدیرمق مقصدیله اونک - استانبول و بوغازلر داخل اولدینی حالده - جنوبه طوغری ایلرولمسنه قارشى موافقتکارانه برطور اتخاذا اولمسنی توصیه ایدر. مشارالیه، ترک خدمتله کوشه انزوایه چکلدیکی زمان کندینک شرق سیاستنی شویولده تلخیص ایدیوردی: « روس قوتنک جنوبه طوغری صارقاسیله بزم منافع مزدیکر دولترککندن دها زیاده قابل تألیفدر. » [۱]

روسیه نک استانبوله تجاوزی حالنده آلمانیانک آله جنى وضعيته و او حالده آوستریا ایله انکلتراهله آلمان مظاهرتنه استناد ایدوب ایدهمیه جکلرینه دائر پترسبورغدن استمزاج وقوعی احتمالی درپیش ایدن بیسمارق دیرکه: « قناعتجه بویله براستمزاجه ویریه جک جواب



قطعیاً منی اولمیدر . « [۱]

اخیراً انتشار ایدن بر اثر ده شومهم سطر لر کوریلور : « بر زمانلر بیسمارق ، روسیه نك چناق قلعه بوغازینه وضع ید ایتسنه یالکز مساعده دکل ، بونی ممکن مرتبه تسهیل ایتک بیله ایستیوردی . [۲] آلمانیا خارجیہ نظارتنك رجال مهمه سندن اولان موسیو هولشتاینك بر مکتوبندن مستخرج بوفقره ایله ۱۸۸۷ ده آلمانیا ، روسیه آرہ سنده تعاطی ایدیلن مقابل تأمینات عهدنامہ سنہ اشارت ایدیلک ایستئمشدر . اشبو عهدنامہ ، مقدما ۱۸۸۱ ده عقد و ۱۸۸۴ ده تجدید اولنان اوچ ایمپراطور لر اتفاقك ، پترسبورغ ایله ویانہ بیننده - بلغارستان وقایعی طولانیسیله - تحدث ایدن اختلافدن ناشی ابقا و ادامہ سنہ امکان قالدینی زمانہ مصادفدر . آنفالبیان ۱۸۸۷ عهدنامہ سی ایجابجہ روسیه و آلمانیا ایمپراطور لری اوچنجی بردولت طرفندن تجاوز وقوعه ید یاخود روسیه نك شرقه طوغری توسیع ممالک سیاستنی موقع اجرایہ وضعنده بربرلرینہ قارشى خیر خواهانہ بریطر فلق وعدنده بولنشلدردر . اشبو عهدنامہ یه مربوط وغایت محرم بر پروتوقول صوک فقره عهدیہ یی موضحدر . بو پروتوقول شو یولده محرردر :

« برنجی ماده - آلمانیا بروجه سابق بلغارستانده منتظم ، قانونی بر حکومت تشکیلی ضمننده روسیه یه مظاهرتده بولنه جقدر . و پرنس دوباتنبرغك عودتنه هیچ بر صورتله موافقت ایتیه جکنی وعد ایلر .  
« ایکنجی ماده - حشمتلو روسیه ایمپراطوری حضرتلری ، روسیه نك منافعی تأمیناً قره کز مدخلنك مدافعه سی وظیفه سی

[۱] جلد ۲ صحیفه ۲۹۹ Gedanken und Erinnerungen

[۲] ۱۹۲۱ جلد ۳ صحیفه ۱۷ Freiherr von Eckardstein. Die

Isolurung Deutschlands.



در عهدہ ایلک مجبوریتندہ بولنور ایسه ذات ایمپراطورینک کندی  
ممالکنک آناختارینی محافظہ مقصدیلہ اتحاد بیورہ جفی تدایر حقندہ  
آلمانیا ، خیرخواہانہ بیطرفلغنی و معاونت معنویہ و سیاسیه سنی  
وعد ایدر . « [۱]

بوایکی ماده عہدیہ ، او چ ایمپراطورلر معاہدہ اتفاقیه سنک برنجی  
مادہ سنہ آزچوق تقابل ایدر کہ مذکور برنجی مادہ دہ شویله دینیوردی :  
« دول ثلثہ عاقدہ دن بری دردنچی بر دولت معظمہ ایلہ حال حربہ  
بولنہ جق اولور ایسه دیگر ایکی دولت عاقدہ اوکا قارشی خیرخواہانہ  
بیطرفلقدہ بولنہ جقدر در واختلاف واقعک محلی برشککہ منحصر قالمسنہ  
صرف مساعی ایدہ جکلر در .

« بوشرط ، او چ دولت عاقدہ دن بریلہ دولت عثمانیہ بینندہ محاربه  
ظہورندہ دخی تطبیق اولنہ جقدر . فقط بوتطبیق ، او چ دولت بینندہ  
حربک نتایجنه دائر دہا اولجہ ائتلاف حصول بولمش اولمسیلہ مشروطدر .  
« دول ثلثہ عاقدہ دن بری دیگر ایکی متفقینک برندن دہا مثبت  
بر معاونت کورہ بیلدیکی حالہ اشبو مادہ نک قیمت مجبوریہ سی دولت  
متفقہ ثالثہ حقندہ بتون قوتیلہ جاری اولہ جقدر . « [۲] دیمک کہ برلین  
معاہدہ سنک فردای انعقادندہ بواو چ دولت معظمہ یکی برعثمانلی - روسیہ  
محاربه سی احتمالی درپیش ایتشلر وایکی دولت معظمہ مرکزیه نی اشغال  
ایدن شیء ، آوستریا - مجارستانک بومحاربه دن نہ کی فوائد استحصال

[۱] نورد دویچه الکمانیہ چایتونف غزتہ سنک ۱۲ ایلول ۱۹۱۹ تاریخی  
و ۳۴۳ نومرولی نسخہ سندن جلد ۱ صیفہ ۱۲ Die Polischun Geheimverträge  
O. U. 1879-1914

[۲] ویانہ ۱۹۲۰ دوقتور Pribram طرفندن .



ایده جکی قضیه سی اولمشر . فی الواقع سالف الذکر مقاوله نامه نك  
ایکنجی ماده سی ده شویولده در :

« ... بربرلری آره سنده هیچ بر ماینته محل بر اقامق آرزو سنده  
بولتان اوچ دولت معظه ، بربرلرینک بالقان شبه جزیره سنده کی منافع  
مخصوصه لرینی نظر اهمیتده طومنی تعهد ایدر لر . اوندن بشقه روم ایلیده کی  
ممالک عثمانیه عائد استاقوده تعدیلات جدیده اجر اسنک یکدیگری بیننده  
موافقت حصوله منوط بوله جغنی ده بربرلرینه قارشی وعد ایلر لر .. » [۱]  
مع هذا بیسمارقی دساتیر وعنعناته صاپلانمش قلمش عدا یتک بر خطا  
اولور . اصغری فدا کارلقه اعظمی فائده استحصال ایتک و ایلروده  
کندیسنه خصم اوله بیله جکلری بوشنه قوتلندیرمکن چکنمک ، آهین  
مزاج شانسلیه نك دستور حرکتی ایدی . نته کیم کندیسنک ناشر  
افکاری اولان هامبورگز ناخریختن غزته سی ۱۷ کانون اول ۱۸۹۲ تاریخلی  
نسخه سنده شویوله دیمشر : « پرنس ، آلمان سیاستنک روسلرک استانبول  
حقنده کی پلانلرینی ترویج ایدر اولماسنه هیچ بروقده راضی دکلدی ؛ لکن  
روسیه نی کندی پلانلرینی تطبیقندن منع ایتک دخی آلمانیا به عاڈ  
دکدر اعتقادنده بولنیوردی . »

بیسمارق ده ، خاطر اتنده روسیه نك استانبوله وضع ید ایتسنک انکلتزه  
ایله اولان اختلافی اسبابی تزیید وانکلتزه نك ده برلینه تقریبنی استلزام  
ایده جکنی سرد ایله آلمانیا نك لدی الحاجه بیطرف قالمسنک محق اولدیغنی  
بیان ایتمشر .

ایشته کوریلرور که شانسلیه برجهتدن روس احتراصاتی او قشادینی


حاله دیگر جھتدن کنديسنجه فائده تامين ايدہ بيلہ جک اولان بعض اختلافات دوليہ نك تحيزي تخيوري تمني ايدیوردی. بوتمنی، بوامیدلر ۱۸۸۷ دە - انکلتزم نك ایتالیا و آوستریا ایله ائتلافی شکلندہ - حیز آرای حصول اولمش و بوائتلافک غایه سی روسیہ نك بالقانلرده کی دائرة نفوذی تحید ایتک و شرقده کی استاتوقوی ایتدیکی کی تعدیل ایدہ بیللمه سنه مانع اولمق ایدی. آلمانلرجه شرق اتفاق مثلی Orientdreil und اولنان بوائتلافدن فصل تالیدہ بحث ایدہ جکز .

شوراسی ده شایان قیددرکه ۱۸۸۰ ده سلطان عبدالحمید ثانی نك طلبنه بناء بیسمارق، عثمانلی اردوسنک تنسیقی واداره ملکیه سنک اصلاحی ضمنندہ آلمان یادن ضابطان و مأمورین کوندرمشدی. بیسمارقک بو معامله سی، طوشانه قاچ، تازی یه طوت دیمکه بکزه ر ایسه ده شانسلیه ولی عهد فریدریق ویلهلمه ۱۵ تموز ۱۸۸۰ تاریخله کوندردیکی برمکتوبده آلمان ضابطانیله آلمان مأمورلرینک در سعاده اعزامی شوصورتله تفسیر ایدیور: « روسیہ ده کی ملیتپرورلرایله پانسلاویستلر و آلمانیا علیهدارلری بزه هجوم ایدنجه دولت عثمانیه نك بقاسنه و قیمت عسکریه سنه لاقید بولنه میز. تورکلر بزم ایچون هیچ بر زمان تهلکه لی اوله مز، فقط بعض احوال اوله بیلیرکه اونلرک دشمنلری بزم ده دشمنلر کیسیه بیلیر. » [۱]

بیسمارقک بوفکری عبدالحمید تورکیه سی حقنده بعد بعد تبدله اوغرا دیغی اکلاشیلور. فی الحقیقه ایکنجی ویلهلم، خاطر اتنک باشندہ شانسلیه نك نظرندہ تورکیه نامنده بر قوتک موجود اولمدیغی بسط



ایتمکده در . فقط هر نه صورتله محاکمه ایدیلورسه ایدلسون شبهه  
یوق که ضعیف برتورکیه، بیسمارق سیاستنک دایما بر بازیچه سی و اوسیاستک  
قربانی اولمغه محکوم ایدی .



## فصل ثانی

### باب عالیہ نک سیاستی

تورک - آلمان مقارنتی روسیہ نک مطمح نظری - سلطان عبدالحمیدک  
فرانسہ ایلہ مقارنت ایچون بی سود مساعیسی - برلین معاہدہ سندن صکرہ  
فرانسہ نک شرقدہ کی سیاستی - احتراص پرور آوستریا - راینختاد ائتلافی -  
تورکیہ یہ قارشئ انکلتزہ نک علاقہ نسبیہ سی - استانبول مسئلہ سی - بیقونسفیلدک  
اطراد سزلغی - پیت Pitt ک احداث ایتدیکی سیاست شرقیہ - داوید  
اورقارد David Urquard - ہوویفلرک تورک علیہ دارلغی - تورک لارک  
انکلیز مجملکی - سلطان عبدالحمیدک بعض انکلیز دسایسنہ فریفتہ اولیشی -  
مصرک اشغالی - بو اشغالک تورکیہ یہ عائد نتایجی - انکلتزہ نک تورکیہ  
خرستیانلرینہ قارشئ حمایتکارلغی - انکلتزہ منافعنک جهانشمول انکشافی -  
ائتلاف مثک - بیوک بریتانیانک وضعیت متفوقہ سی - ادارہ حمیدیہ نک  
انکلیزلری اغضاب ایتسی - انکلیزلرک مخادنت سیاستنہ عودتلری - آمیرال  
غامبلک مأموریتی - فوت اولان فرصت - تورکیہ نک دولترک ادارہ  
مشرکہ سی آاتنہ وضعی تکلیفی - ایکنجی ویلہمک بر مقاسمہ تکلیفی رد  
ایتسی - آلمان محبتنک برحدی وار - بیسمارک ومصر مسئلہ سی - روسیہ  
علیندہ انکلتزہ - ایتالیا - آوستریا اتفاق - قریسی نک نظریہ لری -  
بیسمارک اتفاق تکلیفنہ سلطان عبدالحمیدک عدم موافقتی - آلمانیا اتفاقلری  
سلسلہ سی - ایکنجی ویلہمک جهانشمول بر سیاستہ قالمیش سی - قیصرک  
طرخان پاشایہ بیاناتی - موسیو دوتیریچک انتقاداتی - ایش ایشدن  
پجدکدن صوکرہ ایکنجی ویلہمک حقیقت حالی ادراکی - قرونشتاد -  
اتفاق مثک ضعیفی - انکلتزہ نک طرز حرکتی - بغداد شمندوفری -



انکیزی-آلمان رقابتی — ویلقوقسك سوزلری — سور ادوارد غره‌یك سوزلری — آلمان رجال حكومتك اعترافلری — انكتره‌نك بر اخطاری — پرنس بولووك شرق سیاستی — آلمانیا ، بيسمارك قورقديغی خصما اتفاقنه كيديبور — بغداد شمندوفری ، توركيه‌نك لحد فزاسی در .

دولت عثمانیه‌ی آلمانیا‌یه میل ایتدیره‌ن عوامل متعددومتنوعدر .  
تورك — آلمان محادثتی ۱۸۷۸ ده آیاستفانوسده روسلرك توركلری امضایه مجبور قیلدقلری شرائط عهدیه‌ی فسخ ایدن برلین قونغره‌سنك فردای انعقادنده بدأ ایتشدر ، برلین مؤتمینه کنجج آلمانیا ایمپراطور- لغنك شانسلیه‌سی پرنس بيسمارق ریاست ایلش وبومؤتمرك نتایج حسنه‌سی کورولش اولسنه مبنی ، اوروپا سیاست عمومیه‌سنه بیكانه بولنان سلطان عبدالحمید ثانی ایله وزیر معتمدی سعید پاشا ، پرنس بيسمارك تورکیه‌یه خیرخواه بولندیغنه ذاهب اولمشلردر . حتی بيسمارك قونغره‌ده تورکیه منافعی صیانه چوقومت و غیرت ابراز ایتدیکنی خاقان مشارالیه دائماً لسان ستایشله تذکار ایتدیکی معلومدر . بوندن بشفه پك معتدل وپك محافظه‌کار طرزده بر مشروطیتله مقید اولان آلمان اصول حکومتی ۱۸۷۶ ده اعلانه مجبور اولدیغی قانون اساسی‌ی برسنه صکره فعلاً لغو ایدن سلطان عبدالحمیدك تمایلات مطلقیت پرورانه‌سنه ملایم بولنیوردی . اساساً برلین قونغره‌سندن صکره اوروپاده تحداث ایدن منظومه سیاست وتورکیه‌نك کچیردیکی محاربات وداخلی اغتشاشات طولایدسیله کسب ایتدیکی وضعیت مؤله ، تورکیه‌ی دول معظمیه دلخواهی وجهله مقارننه توسل ایدمك حالده بر اقامش ایدی . ذاتاً تورکیه افلاس ایتشعد اولوندیغندن ضسته آرام ایله اوغراشمغه کیمسه لزوم کورمیور دی . محافظه‌کارلر رأس اداره‌ده بولندقلری هنکامده آیاستفانوس

معاهده سنی فسخ ایتک ایچون تورکیه یه مظاهرت ایدن انکلتزه دخی بیقونسفلید Beaconsfield سیاستدن یوز چویرمش و تورکلرله مسلمانلره قارشى کوکشمش خصومتی ایله متعارف اولان غلادستون gladstone حقمرزده سلفنک پولتیقه سنه تمامیه مخالف بر مسلک انخاز ایتک اوزره موقع اقتداره کلشدى .

تورکیه نك مقدراتنده تاثیرات مخصوصه سی درکار اولان انکلتزه سیاستنی تدقیق ایتدن اول اوزمانلر تورکیه نك روسیه ، فرانسه و آوستریایه تقرب ایده بیلیمه سی امکانی اولوب اولمديغنی آکلامق اوزره دوات علیه نك اشبو دولترلره اولان مناسباتی کوزدن کچیرم :

دولت عثمانیه نك دونکی و یارینکی دشنی بولنان روسیه ، دائماً تهلکه لی بر قومشو ایدی . آقساقوف Aksakof له توتتی یف Léontiéf قاتقوف Katkof وسائر نك متادی تحریکاتی و بر پوبه دونوسچه ف ك تحت نفوذنده بولنان چار اوچنچی آلکساندرک پان روس تمایلاتی روسیه نك نه فکرده دوام ایتدیکنه هیچ شبهه بر اقایوب روس چارلرینک کندیلرینی وارث مشروعلری عد ایتدکلری بیزانس ایمراطورلغنک پایتختی اولان استانبوله هر وقتدن زیاده کوز دیکمکده اولدقلرینی کوستریوردی ؛ بناء علیه تورکیه ایچون اوصرمده نه روسیه ایله تألیف منافع ایتک نهده اونکله بر مقارنت پیدا ایتک ممکندی .

فرانسه ده ایسه حکومت جمهوریه وجهه سیاستنی روسیه یه چویرمش حتی بالقان اغتشاشاتی و اونی تعقیب ایدن شرق محارباتی هنسکامنده اسلاومقاصدیه حال موانستده بولمش ایدی . بوندن طولانی سلطان عبدالحمید ثانی نك ۱۸۸۱ تاریخنده فرانسه نك در سعادت سفیری موسیو فورنیه Fournier یه باب عالی نزدینه بر فرانسز هیئت



عسکریه سنک اعزامی حقنده کی مراجعتی دخی ثمره سز قلمش، زیرا  
 بو مراجعتیه پارسده قولاق آسان اولماش ایدی . بو مراجعتی تأییداً  
 سابقاً فرانسز ضابطی اولان یاور شهر یاری درهسه Dreyssé پاشانک  
 فرانسه زمامدارانی نزدنده کی تشبثاتی ده - بونلرک روسلرله مقارنت  
 سوداسنده اولملری حسیله - فائده بخش اوله مادی . بونک  
 اوزرینه درهسه پاشا پادشاهه دوست و خادم صفتیه ، تورکیه نک اردوسنی  
 تنسیق ایچون آلمانیا یه مراجعت ایتسنی توصیه ده بولنشدر ، و ۱۸۸۲ ده  
 سلطان عبدالحمید طرفندن واقع اولان طلبه بیسمارق اجابتیه در حال  
 بر هیئت ضابطان اعزام ایتمشدر [۱] .

نه غریب تصادفدر که تورک - آلمان مقارنتنک سائق بر فرانسز ضابطی  
 اولیور ! اوزمان دولت عثمانیه نک اوزاتدیغی دست مخالفتی فرانسه نک  
 رد ایتسی برنجی دفعه دکلدی .

روسیه ، ۱۸۸۷ ده فعالانه بر بالقان سیاستنه تصدی ایدنجه ذات  
 شاهانه ، کندیسيله پترسبورغ آره سنده برخط وصل تشکیل ایتک  
 اوزره فرانسه یه تقرب ایتک ایسته مشدی . استانبولده فرانسز سفیری  
 قونت دومونته بللو Montébello فرانسه سیاستنی تورکیه لهنه میل  
 ایتدیرمک ایچون چالیشدی ، فقط تشبثاتنده موفق اوله مینجه ذات  
 شاهانه یه امنیتی حائر بر ذاتک پارسه مأموراً اعزامنی توصیه ایتدی .  
 وبالا آخره پارسه سفیر کبیر تعیین اولنان صالح منیر بک کوندرلدی . فقط

[۱] بو تفصیلاب سلطنت سنیه نک سابق یازس سفیر کبیری صالح منیر پاشادن  
 آلمشدر . بر آره لقی سلطان عبدالحمید ثانی ، فرانسه نک کوستردیکی قیدسزلقدن  
 پاشای مشارالیه شکایت ایتدیکی صروده بو وقعه دن ده بحث ایشدر و کیفیت  
 بالا آخره درهسه پاشا طرفندن منیر پاشایه تأییداً حکایه ایدیشدر .



ینه مطلوب حاصل اوله مدی. بر زمان صکره فرانسه یه قارشی محبت پرورده ایلان ژون تورکر دخی، موقع اقتداره کلنجه فرانسزلر ایله مقارنت ایچون چالیشدیله. لکن اونلرده موفق اوله مدیله. زیرافرانسه سیاستنده روسیه اتفاقنک عامیت تصرفکارانه سی باب عالینک تشبثاتنک خیزحصوله گلکهنه متادیا مانع اولمقده ایدی.

شوده شایان تذکاردر که حرب عمومیدن صکره متارکه بدایتلرنده تورکر آراسنده فرانسز محبی اولانلر - که بونلری عددی پک کثیر ایدی - استانبولک اشغالی متعاقب معروض قالدقلى سوء معاملات طولایسیله فرانسه ایله روابط قدیمه نك احیاسی امرنده بسلدکلى امللرک تحققدن ناامید اولدیله. بونلر بر قله مانسو حکومتنک بزه مساعد بولمقدن پک بعیداولان استقامت سیاسیة سنی ادراک ایده مدیله. اوطور خصوصتکار دورین بعض فرانسزلرک، وقایعکده تأییدیه نمایان اولدینی اوزره، شرقده تورکرک پک قیمتدار برعامل توازن اولدینی فکری نشر وتعمیمه موفق اولملرینه قدر دوام ایتدی.

فرانسه نك شرق سیاستی هرهانکی نقطه نظر دن محاکمه ایدلسه ینه، روسیه یه تقر بندبری سیاست مذکوره دائره سنده اتخاذ ایتدیکی مسلکده بیوک ثبات ابراز ایتدیکی کوریلور. او ائشاده فرانسه ایچون دولت عثمانیه نك تمامیت ملکیه سی واستاتوقونک محافظه سی کیفیتلری ساده جه بر موازنه مسئله سندن عبارت ایدی، وغایه سی هرشیدن اول بالقانلرده کندی نفوذینی تأسیس ایتک، شرقده جرمن انبساطنی منع ایتک اولدی. فرانسزلر رومانیاده و یونانستانده آلمانیا یه موفقیتلی بر رقابت پولتیقه سی تعقیب ایتدیله؛ انکلتره و ایتالیا ایله اولان ائتلافلری سایه سنده بحر سفید حوضه سنده واسع مقیاسده بر عرب سیاستی تأسیس



وبرية الشام اوزرنده کی ادعای رخی تصدیق ایتدیرمکه برابر فاس ممالکنک الحاقی ده تأمین ایلدیلر .

مصر و طرابلس غرب کی بحرسفید سواخلنده کی ممالک عثمانیه ده روسیه ایلله اولان اتفاقک فرانسه یه بخش ایتدیکی قوت و نفوذ سایه سنده آنف البیان استیلا سیاستنی تطبیق ایچون بر زمین تعویض مقامنده قوللانیلیوردی . ایشته عبدالحمید ثانیکنک بیهوده تشبثلیله ده ثابت اولدینی اوزره اوچنچی فرانسه جمهوریتنک سیاست و منافعی دولت عثمانیه ایچون قطعاً موافق عد ایدیلله مز ایدی .

دولت علیه روسیه ویا فرانسه ایلله مقارنت ایدمه مدیکی کی آوستریا یه ایلله ده تأسیس محادنت ایتمی قولای دکدی . واقعا قدیم هابسبورغ ایمپراطورلنی ، علی الخصوص مترینخ Mettenich دورندن اعتباراً ، تورکیه یه قارشی دوستانه و محافظه کار بر وضعیت اتخاذ ایتشدی ؛ فقط صادووا و سهدان و قعه لرندن صکره شمالی جرمانیادن قطع نظر ایدمه رک مقدراتنی بشقه وادیده تعقیبه باشلادی که بوده کندی منافعی ایلله عثمانلی منافعنک مصادمه وادیس ایدی ، بو سیاست ایجابجه ایمپراطور فرانسوا ژوزف بوسنه - هرسکه کوز دیکدی .

۱۸۷۶ ده صربستان ایلله قره طاغ ، هرسک عصائی حمایه دولت عثمانیه یه قارشی اعلان حرب ایدنجه باب عالی مذکور امارتله علیهنده سهولتله عسکر تحشید ایدمه بیلمک اوزره بوسنه - هرسک داخلنده بعض نقاط سوق الجیشیه نک آوستریا - مجارستان عساکری طرفندن اشغالی ویانایه تکلیف ایلشدی . باب عالی ایلله بر وضعیت اتفاقیه احداث ایتمه که هیچ یناشمق ایسته میان قونت آندراش Conte Andrassy ایسه ۸ تموز ۱۸۷۶ ده رایخشتادده روسلرله اویوشمینی

و بوسنه - هر سڪك اوستريايه الحاق مستقبلنی تأمین ایتمی ترجیح  
ایلدی. بو الحاق کیفیتنی بالآخره اداری، عسکری اشغال شکنده  
اوله رق برلین قونفره سنده تحقق ایتدیردی.

بوکی احواله و تورکیه نك آوستریا - مجارستان دولتنك قیمت  
عسکریه سی و تمایلات سیاسییه سی حقنده کی اعتماد سزلفنه بناء سلطنت  
سنیه نك دولت مشارالیه ایلده مقارنتی پكده موضوع بحث اوله مازدی.  
شو تقدیرجه دولت عثمانیه ایچون، کندیسییه مقارنت حاصل  
ایده بیله چکی دولتر، یا انکلتزه و یا آلمانیا ایدی.

پارس معاهده سندنبری اوروپانك شرائط پولیتقیه سی تحولات  
کلیه یه اوغرامش اولدیغندن انکلتزه نظرنده شرق استاتوقوسنك ماهیتی  
وقایع کندیله کنندن کماله ایرنجیه قدر ایشی اوزاتمقندن عبارت ایدی.  
انکلتزه سیاست خارجییه سی مدت مدیده محافظه کار طوری لرله  
حریت پرور هوویغ لرك طرز حکومتنه کوره آز چوق متخالف  
ایکی جریانیه تابع بولندی، و دوات عثمانیه ایچون بونلردن برنجیسی  
خیلی مساعد، دیکری علی الا کثر خصوصت پرور ایلده دولت کندی  
تمامیت ملکیه سی حقنده طوری لرك کوستردکری علاقه دارلق  
خصوصنده اکثریا مبالغه ایدیوردی؛ نته کیم هر سڪك عصیانده  
انکلتزه نك مظاهرتنه کووه ن باب عالی، برلین مه موراندومی ایله  
اوروپانك تحت مراقبه سنده اولمق اورره اصلاحات ملکیه اجرایی  
طلب ایدن روسیه، آوستریا و آلمانیا ایمپراطورینه قارشی قطعی مخالفتده  
بولندی. فی الواقع محافظه کار قابینه رئیس اولان دیزرائیلی Dizraei،  
بر آوستریا - روسیه استلافندن توحشه باب عالییه جبراً قبول ایتدیرمک  
ایسته نیلن شرائطه اش - تراک ایتیموب بالقانلرده اغتشاش چیقارمغه



سعی ایدن روسیه قارشی باب عالی نی مقاومت تشویق ایدیورایسه ده بو ذات  
بالا آخره آوستریا - مجارستان دولتنک بوسنه - هر سکی ویکی بازاری  
اشغال ایتسی خصوصنده دولت مشارالیه ایله ائتلاف ایتدیکی صکره دن  
آکلاشیلشدر . انکلتره نك بوتربیی ، یعنی لدی الحاحه باب عالی یه  
بویله فدا کارلق تحمیل ایتک پولیتقه سی ، تابدا یتمه تقرر ایتشدی . وقتا که  
پانسلاویست جریانی تسکین و باب عالی ایله صربستان و قره طاغ امارت لری  
بیننده محاربه وقوعی بر طرف ایتک اوزره قونت آندراشی - قره  
طاغی هر سک عصیاننه فعلاً اشترا کدن منع ایچون یکانه چاره اوله رق -  
امارت مذکوره یه بر مقدار اراضی ترکی لزومنی در میان ایتدی . لورد  
دربی Derby بو فکری باب عالی نزدنده تأیید ایچون تردد  
کوسترمدی [۱] .

حتی طور ی حکومتی آچیقدن آحیقه بر عضو مزك انقطاعنه قدر  
کیدییور وکویا شرق بحرانی ازاله ایچون آوستریا - مجارستان دولتی  
ایله بو خصوصده هم آهنگ اولمق آرزو ایدوب دولت مشارالیه طرفندن  
برمداخله وقوعنه و بوسنه - هر سک ده اونک طرفندن اشغالنه مخالف  
بولتمیوردی . لوندرده انجق روسیه طرفندن واقع اوله جق برمداخله یه و  
روسیه نك استانبولی تهدید معناسنی تضمن ایده بیله جک هر نوع حرکتنه  
قارشیک قطعی بر صورتده قیام ایتک وسلاحله مقابله ده بیله بولمق مقرر  
ایدی . [۱] برانکلیر رجل سیاسی آلمانیا سفیری قونت ( مونستر  
Münster ) « دیمشیدیکه : « انکلتره ، تورکیه نك تمامیت ملکیه سی

Wertheimer. Grf. J. Andrassy, s. Let. xu. s- Zeit. [۱]

صحیفه ۳۱۴ جلد ۲ شتوتقارت ۱۹۱۳ . قونت مونسترک ایمپراطور برنجی  
ویلهلمه ۲۵ حیران ۱۸۷۶ تاریخی مکتوبی .

اغورنده هیچ بر حربه کیریشمز . آنجق استانبولی تصرف موضوع  
بحث اولونجه ، ایش دکیشر . « [۱]

مشیر غازی احمد مختار پاشانک هر سگ عصیانچی تسکینه و قره طاغه  
قارشی حربه مأموریتی هنکامنده یازمش اولدینی بر مکتوبک بعض  
فقراتی بوراده ذکر ایتک فائده دن خالی دکدر . عثمانلیلری روسلره  
قطع مناسباته قدر کوتور مامکی توصیه ایدن غازی مشارالیه دیرکه :  
« حدودلر مزی مؤثر بر صورتده مدافعه ایده بیلیر سهک نه دولت! فقط  
بویله غالبانه بر مصالحه عقد ایتکلکمز ایچون کافی دکدر . اویله اولسه  
بیله بوسنه و هر سکی الدن چیقار مقلغمز محققدر . انکلیزلر بزمه  
برابر حدودلره قدر کیده مزلر ؛ آنلرک در عهده ایده جکلری شی آنجق ،  
بوغازلرله جوارینک مدافعه سیدر » [۲]

استانبول و بوغازلر مسئله سنده انکلیزه منافعیله آوستریا-مجارستانک  
مقاصدی تمامیه توافق ایتکده ایدی . فی الواقع قونت آندراشی ایله  
پرنس غورچاقوف ۱۸۷۶ تموزنده رایخشتاده کیدرکن اثنای راهده  
قونت آندراشی ، کندیسنک احضار ایلش اولدینی لایحه یی قصد  
ایله : « عفواید رسکنز پرنس ، اونی اوقومق زحمتی اختیار ایتدن اول  
ایشی قیصه کسه جک بر سؤاله مساعده بیوریکیز : سز استانبولی آلمق  
ایستیور میسکنز ؟ » دییه آنسزین بر سؤال ایراد ایتسندن شاشیروب  
قالان غورچاقوف : « آ... خایر » جوابی ویرنجه آندراشی در حال  
« چوقشکر ؛ زیرا عکسی حال محاربه دیمک اولوردی . » دیمشدی . بو

Wertheimer .git. J. Audrassy. s. Let e. s. Zet. [۱]

[۲] غازی احمد مختار پاشانک سرعسکر ردیف پاشایه ۲۱ کانون اول ۱۸۷۸

تاریخی مکتوبندن .



مکالمه ، روسلرک بالآخره استانبول اوزرينه يورودکری واستانبولک عاقبتی کندی فکرلرينه کوره تعيين ايدم جکلرمش کي طاوراندقلى صرهدم بر آوستريا اردوسنک شرق حدودلرنده تحشدي اسبابی تفسير ايدر .

ايشته اوزمان انکلتره دخي - هو ويغلرک مخالفتي جهتيله بعض ترددلردن صکره - بردونما کوندرمکه قرار ويرمش و بودونما چناق قلعه بوغازندن کچهرک اذميت کورفرزنده لنکر انداز اولمش ایدی .

قره دکزک آناختاری بولنان استانبول مستثنی اولمق اوزره انکلتره نک دولت عثمانیه نک بقاسنده کی علاقہ سی نسبی ومحدود ایدی . غلادستونک روایتنه کوره صکره لری لورد بیقنسفلید اسم وعنوائی آلان دیزرائیلی مصره استیلایي بيله قوریورمش . (۱) هر حالده بو سیاست آدمی روسیه ايله آ کلاشدقن صکره کندی مملکتی حسابنه قبریسک اشغالی حقسزلق عد ایتماش ، (۲) وبرلین مؤتمرده فرانسه نک تونس حقنده کی

(۱) مورلهی Life of glastone Morley صحیفه - ۵۵۱ جلد - ۲

(۲) بومعاهده ، دور عبدالحمید ثانیده وصادق پاشانک باش وکالتی ایامنده عقد ایدلشدر . او صرهدم خارجیه ناظری بولنان صفوت پاشا مرحوم برکون بیلدیز سراینه دعوت اوانور . پاشا ، سرایه کیدر وبر اوطیه کیررکه اوراده مشارالیه صادق پاشا ، انکلتره سفیری ومابین مشیرلکشنده بولنان انکلیز سعید پاشا دیمکله معروف سعید پاشا بولینورمش . صادق پاشا صفوت پاشایه برکاغد ویرر و « بونی اوقویکزده مطالعه کزی بیان بیوریکز . » دیر . صفوت پاشا کاغده کوز کزدیرر . قبریس حقنده - کندیسنک اولجه معلوماتی اولدینی - برمعاهده مسوده سی اولدینی اکلار . کاغدی اوقودقن صکره مطالعاتی درمیان ایتکه باشلار ؛ فقط انکلیز سفیری درحال آیاغه قاله رق « خایر ، خایر . مطالعه یه فلان محل یوقدر . بونی سلطان بویه جه قبول بیورمشدر . » دیر و خارجیه ناظرینک سوزینی کسر .

منویاتی ترغیب و تشویق در خالی قلمامش آید. عثمانی - روس محاربه سندن  
اولکی وقایع حتی محاربه اشناسنده دیزرائیلی نك استاتوقو لهنده فعالانه  
مداخلاتی، تورك علیه‌نده کی خصوصیتلری درکار اولان انکلتزه لیبرالترینک  
وتورکلرک او تاریخده بلغارلری تأدیباوتنکیلا یاپدقارینی خیالخانه سنده  
اعظام ایله انکلیز خلقنه دیو آینه سنده کوسترمکه موفق اولان غلام دستونک  
وتورك مظالمی مصالترینک تأثیریه لیبرالره التحاق ایدن بر جوق  
محافظه کارلرک اعتراضاته هدف اولمشدر. بو مخالف جریانلر قارشیسنده  
زبون ونقطه نظرینی مدافعه دن عاجز قالان لورد بیکن سفلیده حقمزده کی  
تصوراتنده افراطدن تفریطه دوشمکه باشلادی. مثلاً برلین مه موراندومه  
بدایه موافقت ایتدیکی حالده براز صکره تبدیل فکر ایدرک مظالم  
اجتماعلری Atrocity meeting تعبیر ایتدکری اجتماعلرک تأثیریه باب  
عالی بی مذکور مه موراندومه کی شرائطک دها آغارلینی قبوله اجبار  
ایتمکه قالقیشدی، و بو حال غورچاقوفی مطالبنی تشدیده سوق ایدوب  
انکلیز سیاستنده حاصل اولان تضاد و بحرانی حاد برحاله کتیردی.  
امور خارجه وکیلی اولان لورد سالیسبوری دخی نهایت ایغنایه فک  
تأثیر و تفوذی آلتنه کیردیکندن روسلرله بالنتیجه او یله بر ائتلاف حاصل  
اولدی که قونت آندراشی لوندره ده کی آوستریا سفیری قونت بو یست  
Beüst • اولان ۲۹ مایس ۱۸۷۷ تاریخلی مکتوبنده ائتلاف مذکورک  
ماهیتنی شو سوزلرله تصویر ایدر: « بن فکرمی لوندره یه تام زماننده  
بیلدیردم، لکن انکلتزه نك روسیه ایله متحد آ ترک ایتدکری بر نقطه  
نظرده آوستریا - مجارستان دولتی ثبات ایده مزدی، نهایت دولتلر



مشرکاً باب عالی به او یله تکلیف لرده بولندیلر که نتیجه سی بر جواب رد  
واوندن متولد مشکلات اولدی . « [۱]

شرق قریبده انکلیز پولتیقه سنک انکشافنی لایقیله ا کلامق ایچون  
اون سکزنجی عصرک نصف اخیرینه قدر ارجاع نظر ایتملیدر . اوتار یخلرده  
انکلتزه ، شمال دکزلرنده روسلرله فعال و متمر تجار تلی واردی .  
متعصب بر خریستیان اولان و اساساً منفعت پرست و مادیت پرور اولقله برابر  
ینه حسیاته تابع و تأثر اتنده صافدل بولنان انکلیز قومی ، تبعه غیر مسلمة  
عثمانیه نک مسلمان اداره سی علیهنده کی حرکتلرنده اونلری التزام ایدر  
ایدی . بوندن طولاییدر که ایکسجی قاترین زمانه مصادف روم فترتی  
هنکامنده انکلتزه ، روملری استخلاص مقصدیله جوش و خروشه  
کلدی . بر چوق انکلیز ضابطلری ، روس اورلوف Orlov و انکلیز  
الفینستون Elphinston اداره لرنده اوله رق عاصیلرک اطهار دکزلنده  
دولته قارشی اجرا ایتدکری قورصانلغه اشتراک ایتشلردی ؛ فقط سلطنت  
سنیه ایچون مصیبت انیکیز اولان قینارجه معاهده سنندن صکره روسلرک  
استانبولی و بوغازلری ضبط ایچون صرف ایتدکری فعالیت متزاید  
انکلتزه ده شبهه و اندیشه لر تولید ایتدیکی صروده تورک لرهنده بر جریان  
باشلامش ایدی . طوریلرک بیوک رئیس اولان پیت Pitt ، روس  
نفوذینک بوغازلردن کچهرک بحر سفیده شامل اولمسی انکلتزه نک امنیت  
بحریه سی ایچون بر تهلسکه عظیمه اوله جغنی تقدیر و روسلرله بویولی  
قیامق مسئله سنی بر دستور اوله رق وضع ایتدی . حرب عمومی به قدر  
حکمی آز چوق اجرا ایتش اولان بو نظریه دن طولانی روسیه



قارشى برسد تشكيل ايدن توركيه ، طورى لر نظرنده كسب قيمت ايلشدى . موسقوفلرله اولان مخادنتلرني دهها خيلى زمان محافظهده اصرار ايدن هوويغلرله كلنجه اونلرده دولت عثمانيه نك مقاسمه سندن الكاول والى زياته استفاده ايدم جك اولان روسلرى تقويه ايتمش اولماق ايچون دولتك انحلالنى تعويقه ده كي فوائدى تسليم ايتديلر . [۱]

اون طقوزنجى عصر ك نصف اولنده توركلر ايچون آتئين دوست و بليغ مدافع اولمق اوزره برانكلز ظهور ايتدى كه او ده داويد اورقوارد D. Urquard ايدى . بو ذات ، انكلتره ده توركلر لهنده ترسم ايتمكه باشلايان جريانى تقويه ايتدى ، [۲] و قريم محاربه سنده تورك - انكلز اتفاقنه منجر اولان زمين سياسى ي احضار ايلدى . بوكا مخالف اولوب على الاكثر متفوق بولنان ديكر جريانك ايلك ناظمى ، پيتك معاصرى و مخالفى اولوب هوويغلر ك رئيس ذى نفوذى بولنان فوكس Fox ايدى . علم اقتصاد مشاهيرندن قوبدهن Cobden دخى بو مخالفتك صناديدندن

[۱] ۱۷۹۱ سنه سنده عثمانلرله آوستريالير آره سنده زيشتوى ده مصالحه عقد ايدلدىكى صره ده مذكور قصبه ده بولنش اولان سر روبر موره ي قايت S, R. Murrey keith ك همشيره سنه كوندردىكى ۲۷ نيسان ۱۷۹۱ تاريخلى مکتوبنده شوسطرلر واردر : « اكر توركيه صويه دوشوب بوغولسه نه كوزل اولوردى ؛ مع التأسف بويله اولميور . اونك ضايع ايتدىكى هر پارچه ، شمال قاريسنك ( يعنى قاته رينانك ) آلنه دوشمور . توركلرى جان صقيجى اولان عادات قديمه لرنده ( يعنى حال عطالتلرنده ) براقه لم ده محو اولوب كينسينلر .... » جريان وقايعك بوسوزلرده كي فكر ونظرى تدقيق و تعميق لزومنى اخطار ايدم جك برحال وشكل آلمسى احتماللرى دائما موجوددر .

[۲] لورد پالمستون ، برادري ويليام تمپل W. Temple . بازديغى ۲۱ مارت ۱۸۳۳ تاريخلى مکتوبنده ديركه : « ذات شاهانه اردوسيله دوختماستى وامور ماليه سنى اصلاح ايتمى ايچون معاوت تجربه سنده بولملى يز . »



بولدى . غلادستونك پيشدارلىرى اولان بو آدملىر ، انگليز سياستنىڭ خرىستىيانلىق منافعىلە توفىق ايدىلىنى و استانبولدىن مسلمان توركلرى طرد ايتىك وظيفەسىنىڭ روسلارە حوالە قىلىنىشى و عىظ ايدىرلدى . تحولات زمانىەدىن وحادثات متتابعەنىڭ اشبو نظرىە اوزرىندەكى تاثيراتىە رغماً توركلرك آسيای صغرى ايجرلىرىنە طردى فكري ، انگليز ليبراللىرىنىڭ شرق سياستلىرىنە اساس اولەرق قالمىشدر . بو فكر كاك بيوك ناشرى اولان غلادستون بومسلىكە پك چوق طرفدارلىرىتشدىردى . توركلەكە خصومت نظرىەلرى عصر اخىرك صو كىندىن اعتباراً انگلترەدە يكانە حاكم اولدى . امور خارجىيەنى اداره ايدىنلر ميانىندەدە تورك خصومتى پرورده ايدىنلرك عددى پك چوغالدى . [۱]

بوراجقده پيش نظر اطلاعه وصى لازم كلن بر نقطه واردركه اوده انگليز لسانىڭ توركيەدە منتشر اولمامسى انگلترە سياستنىڭ وانگلترە افكار عمومىەسىنىڭ صفحات و خصوصياتى تعقيبە مانع اوليوردى ؛ بنا برين استانبول دائماً توركيەنى مسقوف آمال حريصانه سە قارشى مدافعه يە متمايل بر انگلترەنىڭ موجوديتىنە قانع بولنوردى . انگليز ليبراللىرىنىڭ تمايلات خصمانه سە رغماً توركلك نظرىندە انگلترە هر زمان او قديم قريم متفقى قالمىش ايدى . مع مافىە باب على ، برلين معاهدسىدىن ير آز صكرە اورتەدە بر دە كىشكىلك بولنديغى ولوندرە ايله مناسبات و دادىە تا مىنى آسان اولمىديغى بر چوق وسيله لرلە اكلامىشدى .

توركيە ايله انگلترە آره سە كىرن صغوقلقلر بعضاً شخسى سىلردىن دە نشأت ايدىيوردى . مثلاً سلطان عبد الحميد ثانى ، عموجه سى سلطان عبدالعزيزك خلغىندە انگليز رچالنىڭ دخل و تاثيرىنە ومدحت پاشا ايله

برلك اولدقلرينه واقف اولديغى كې انكلترده آلقيشله تلق ايدىلش  
اولان ۱۸۷۶ قانون اساسيسنى فسخ ايدوب اداره مطلقه يي اعاده ايتمسندن  
طولايي انكليزلردن متوحش بولنيوردى . بر روايته نظر آده بعض  
جور ناجيلر ۱۸۷۹ ده كنديسنى خلع ايله سلطان مراد خامسى تكرر  
اجلاسى ضمننده على سعاوى طرفندن وقوع بولوب فقط منتج موفقيت  
اولميان اختلال تشبثك كويا انكلتره سفارتخانه سنده ترتيب اولنديغنه  
خاقان مشاراليه ايقناع ايتشلردى . مصر مسئلهسى دىخى بر درجه يه  
قدر بوكر كينلىكى مؤيد اولمقدن خالى قالموردى .

سويش قنالك كسادى خطه فراعنه نك جغرافى ، سياسى اهميتنى  
فوق العاده تزويد و انكلتره نك انظار اشتهاستى جلب ايدى . بو  
مملكته اسباب تملكى تهيه ضمننده خديو اسماعيل پاشانك ۱۸۷۵ ده  
صانديغى قنال حصه لرى صاتون آلق صورتيله [۱] انكلتره اكتساب  
حقوق ايتش وتعبير جديد سياسى ايله عالمه قارشو مسئوليتلر درعهده  
ايش اوليوردى . مشاراليه اسماعيل پاشانك خديويتدن انفصاله باعث  
اولان بحران مالى ظهور ايدنجه انكليزلر بوندن استفاده ايدوب مصرده

[۱] اشبو حصه لرى فرانسزلر آلق اوزره خديو مشاراليه ايله بازارلغه  
كيريشمش و فيأتى ده تقرر ايتديرمشلر . قاهره ده كى فرانسز قونسلسنك حصه لرى  
بدلى تسويه ايتك و مقابلنده خديو طرفندن ممضى برسند آلق ايجون نزد خديو يه  
كله جكى ساعتدن بر آزال انكليز قونسلسى - بركون اقدام ملاقات طلبى حاوى  
يازديغى تذكرة اوزرينه خديو آلدېغى جوابه بناء - سرايه كلش و معامله  
اشترائيه دن بمخته فرانسزلرله تقرر ايدن فيأتك ايكي مثلى ويره جكنى بيان و حصه لرى  
بالاشترا خديو ده انكلتره بانقيسى نامنه اوله رق بر چك تقديم ايش . بو آليش  
ويريشدن صكره انكليز قونسلسى نزد خديويدن چيقوب كيدر كن انتظار سالوننده  
كورديكى فرانسز رفيقنه « مون شر مع التأسف كچ قالدېكز . زيرا قنال حصه لرى  
طرفزدن صاتون آلمشدر . » ديمش اولديغى مرويدر .



نقوذ سیاسیلرخی تأیید ایتدیلر و ۱۸۸۱ ده عربابی پاشا عصیانی واقع اولنجه دونمالریله اسکندریه یی طوپه طوتوب بر اردو ایله ده مصره استیلا ایتدیلر. فرانسه ده ژول فرهی J. Ferry قابینه سنک مساحه سیله [۱] سهولت کسب ایدن اشبو جرأتکارانه حرکت سایه سنده انکلتزه هندستان یولنی و بحر سفید حاکمیتی تحت تأمینه آلمش بولندی .

عزمکار انکلیز امپریالیتسری نیل وادیسنه وضع ید ایدنجه امید بروتنی بر دمیرویل ایله اسکندریه یه ربط ایتمکی دوشوندیلر. وکندیلرندن اول خطه مصریه یه حاکم اولان ملترکی بحر احمرک سواحل شرقیه سنه، مصرله هندستانک انداخت ساحه سی مثابه سنده اولان ارض فلسطینه و خطه عراقیه یه نصب انظار احتراض ایتدیلر. خصوصاً که سالف الیابن ایکی مستملکه بیننده کی اراضی وسیعیه عربیه، حکومت عثمانیه یه پاموق ایپلکیله مربوط وانکلیز نفوذی آلتنه کیرمکه مستعد ایدی. [۲]

[۱] شایان دقتدرکه اوزمان فرانسه ده انکلیزلی مصرده سربست براقعه سوق ایدنلر میاننده موسیو قله مانصو دخی بولنه یوردی . بو ذات، ۱۹۱۸ ده - کندی اعترافی تحتنده اولدیفی - موصلك اهمیت مخصوصه سنی تقدیردن نه قدر عاجز ایدیه و قتيله مصرک اهمیت فوق العاده سندن ده اورتیه غافل بولندیفی اکلاشیلهمقده در .

[۲] صدراعظم عالی پاشا ۲۱ جمادالاولی ۱۲۸۶ (۱۸۶۹) ده خدیو مصر اسماعیل پاشایه شو یولده اشعاراتده بولنیور :  
طرف عالی داوریلرینه تعریفدن مستغنی اولدیفی وجهله ذات شوکتمات حضرت ملوکانه نك حائز اولدقلری صفت جلیله حکمداری وسلطنته عائد ایکی ماده معتابها واردر . بونک بری ممالک محروسه شاهانه لرنده ساکن ومتوطن اولان تبعه صادقه لرینک آن بآن تزئید رفاه وامنیت وتحکیم اساس ثروت وراحتلری ودیکری حقوق مشروعه ومتبوعه لرینک محافظه تامه سی وظیفه نظیفه سیدر. خطه مهمه مصریه که ممالک حضرت خلافتناهنیک برجزء اعظمیدر.



بناءً عليه انكيزلرك اورالره آل اوزاتملرى وبصره كورفزنندن بدء ايدر  
بر انكيز دمير يولى ايله هندستانى بحرسفیده ربط ایتك ایستملری پك  
طبیعی ایدی . وقتيله لورد كورزونك ، كندی تعبیريله ، هندستان

اورانك حصول حسن اداره سی ایچون تعیین اولنش اولان وظائفك كاینیغی  
ایفاسنه دقت ونظارت شو بیان اولنان قاعده کایه اقتضاسندن اولدیغی قضایای  
مسلمه دندر . بوعالمده حادث اولان مشکلات ومنازعات ومظالم وتلفاتك اکثری  
حق ووظیفه نك فعلیات واجراآتک لایقیله وخالصانه ومتخیرانه تعیین اولنماسندن  
نشئت ایلدیكى ارباب دقت عندنده هر نه قدر دلیل وبرهاندن مستغنی ایه ده مصرک  
اداره سی اوزرینه آراق آراق میدانه چیقان وهر طرفی اشغال ایدن وقوعات  
دخی بونی تأیید ايدر . چونکه مصر دولت علیه جه ازهرجهت اك مهم بر نقطه  
اولدیغندن اوراسی حقنده بافرمان عالی تأسیس وتقریر اولنش اولان شرائطك  
هیچ بریسنه ذره قدر ضعف وخلل طریانه رضا ویرمك سلطنت سینه نك ید  
اختیارنده دکلدر . بناءً علیه شرائط مذکورده نك مسند خلیل خدیوی به عائد  
اولان طرفلرینك صوراجرائیه سی تماميله تعیین ایتنماسندن طولانی تگون ایده بیلان  
حالات موجب انواع مشکلات اولور . ایشته اصل اعتنا اولنه حق ومستقبلی او  
مقوله مخاطرات واشکالدن قورتاره حق بوجه محرر شرائط مؤسسه نك صور  
اجرائیه سنك قراراشدیلمسی قضیه سی اولوب جوابنامه سامیلرینك فحوای عالی  
بومسئله مهمه نك دخی حلنی تسهیل ایش اولمسيله كرك بوخصوصه وكرك طرف  
اشرف حضرت ملوكانه یه اولان صداقت وعبودیتلرینك کالنه دائر ووظائفه  
عدم تجاوز امرنده اولان عزیمت صحیحهرینه دائر اولان تأمینات وتوثیقات  
عند عالی حضرت ملوكانه ده قرین تقدیر ومحظوظیت اولدیغی حسب الخلوص  
بالممنونیه عرض وتبشیره مسارعت ایدرم . عریضه متقدمه عاجزانه مده مندرج  
اولان مواد ومطالبات خالصانه وبلا کتم بیان اولنمیوب اضرار اولنش اولسه  
معاملات آراسنه برامیتسزلک حیلولت ایدوب بوندن دخی برچوق محاذیر تولد  
ایده جکنده ودولتجه مسائل اساسیه ده ذاتیات برطرف طوتیلوب مصلحتك  
اقتضای اوزرینه کیدمك اقدم وظائف اولمسيله عریضه مذکورده ده بیان اولنان  
اساسلرك دوات علیه جه اك مهم شیلر اولدیغی وحالاً واستقبالاً ضعف وضیاعدن  
محافظه لری ذات شوکتمات جناب ملوكانه نك وظیفه مقدسه خلافتناهیلى



ملحقانندن معدود اولان عراقه صاحب اولمق ایستملری ده بونک  
نتایج طبیعه سندندر .

حقوق حاکمیت عثمانیه ایله غیر قابل تألیف اولان بوپلانلرینه بالقانلر

بولندیغنی درایت مسلمة خدیوانه لری تمامیه تسلیم واعتراف ایلیه جکینده اشتباه  
اولنماش ایدی .

جوابنامه عالیلری اشبو اعتقادی تأیید ایتدی واسباب معلومه دن ناشی  
برمدتدنبرو میدان کلاں حال اسف اشمالک هرکونه آثارینی محوره حاضر اولدقلری  
ودائرة معینه وظائف و امتیازی تجاوز ایتک شویله طورسون اويله برخيال و تصویری  
بیله قبول بیورمدقلری بر تفصیل معلوم عالی بیوریلهرق بودخی حق سامی  
داوریلرنده حسن نظر حضرت پادشاهی بی تأکید وتجید ایلدی وبوصورتله  
عرض و اشعار بیوریلان نیات حسنه و افکار مقبوله خدیوانه لرینک حیر فله ایصالی  
ایچون جانب سنی الجوانب داورانلرینه وسیله مناسبه اعطاسی و تقریب ایله کرك  
بوراجه و کرك ذات عالیرنجه احساسی آرزو اولنان آثارک کلیاً اورته دن قالدیرلمی  
تفسیب بیورلدی .

اشبو مقصد خیر مرصده وصولک طریق اسلمی ایسه بالاده بیان اولنان  
قاعده مقتضاسنجه فرمان عالیرک احکام واضحه سنک تمامیه مرکز اجرائیه وضعی  
خصوصی اولدیغندن اولبابده لازم اولان تدابیرک بروجه آتی بیانه مبادرت قلندی .  
شویله که جد عالیلری مرحومه احسان بیورلمش اولان فرمان عالیده مندرج  
اولان ومؤخرأ اصدار بیوریلان امر عالیرله دخی تأکید اولنان شرائط صره سنده  
عسا کر منتظمه مصریه نک حال وهیئت ومدتلی و کندولرینک عسا کر شاهانه دن  
معدود اولدقلری بیانیله مقداری اون سکز بیک نفره تجید اولنش اولدیغنی  
حالده صکره دن اوتوز بیکه قدر مساعده بیورلمش اولدیغندن وجناب مکارم مناب  
خدیوانه لرینک لدی الاقتضا دولته تکشیری تصویب اولندقه عدد معینی تجاوز  
ایتدیرمیه جکلری وبومقدار عسکره نظاماً مقتضی اوله جق تفنک ومهماتدن زیاده سنک  
تدارکی ایسه بیهوده بر مصرف دیمک اوله جفی جهتله مقدم ومؤخر اوروپا  
و آمریقان آلنش وسپارش بیورلمش اولان ایکی یوز بیک عددی متجاوز  
ایکنه لی تفنک عدم لزومی تصدیق وترکنی تمجیل بیوره جقلری مثللوینه شرائط  
مرقومه داخلندن چیقلماش اولمق ضمننده فرانسه وتریسته ده دردست انشا



وارمنستان حقنده انكيزلرك سياسى تلقيلرينك عين درجه ده نامساعد بولمى ده منضم اوليور ايدى . غلادستونك وفاتندن صكره ده حكىمى جارى قالان وتوركىه عليهنده شدتى محافظه ايدن سياست موجبجه

اولان زرهلى كىلردن دخى صرف نظر اولنه جغنده شبهه يوقدر . بروجه مشروح زائد اولان تفنكلرك وزرهلى كىلرك تركنده اكرچه مشكلات اولدينى يعنى رد وفروختى قابل اوله مدينى حالده تسهيلات للمصلحه بهاليله طرف اشرف حضرت ملوكانه دن اشترا بيورلمى مقرر در .

برده ينه مذكور فرمان عاليلر حكمنجه مصرك كافه تكاليف ماليه سى نام نامى حضرت پادشاهى به اوله رق جبايت اولنق لازم كلوب اكرچه تكاليف مذكور هك اخذ وصرفى خديويته عائد ايسه ده مكلفين اهالى به تحمیل اولنان تكليفاتك جنس ومقدارى ومحل صرفى تحت وقوف حضرت ملوكانه ده اولدقه نام شاهانه به تحصيل اولنسى شرطنك بركونه معنا ومحلى اوله ميه جغندن وماخوذات وصرفياتى هر درلوتدقيقاتدن كچورمكده اصلا تردد بيورمدقلى موازنه دفترلرينك مجلسله قونلديغنه دائر اولان اشعار عاليليله دخى ثابت اولديغندن وواقعا بونده هر وجهله مصيب اولدقلى دركار اولوب فقط بويله بر اصول نافع هك اكالكك هم ذات معاليسات خديوانه لرنجه وهم مملكت پادشاهينك واهالينك امنيتجه اشد لزومى ميدانده اولدينى مثللو معلوم على داوريلى بيورلدينى وجهله خارجى استقراضلر مملكتك احوال حاله واستقباليه سنى رهن ايتك وبونلرك فائض ورأس المالك ايفاسى ايچون وارداته ضم ايلك كى تدابيرى موجب اولق امر ضرورى اولوب بودخى امور عظيمه دن ومسئوليتنك يالكز طرف سامى خديوانه لرينه راجع اولسى لايق اوليه جق مواددن بولنديغندن بهر سته ترتيب بيورلمقه اولان ايراد ومصرف بودجه لرى بركره ده بو طرفه ارسال بيوريله رق منظور على حضرت ملوكانه بيورلمسى وبعد ازين استقراض خارجى به لزوم كورنديكى تقديرده امثال سابقلى وجهله اسباب وشرائطى وفائض ورأس المالك قارشولنى كوستريله رك اول امرده خاكپاي هايون حضرت ملوكانه دن استيدان بيوريلوب اولبابده شرف صدور بيوريله جق امر وفرمان جناب پادشاهى بي حاوى برقطعه امر على استحصال بيورلمسى جمله ارادات فوائد آيات حضرت ملوكانه دندر .

مصرك معاملات خارجيه سى دول متحابه ايله منعقد اولان معاهدات دول



عثمانی تابعیتندن قورتولمق ایستیان ارمیتلرک ، تپیروس و ماکدونیا  
خرستیانلرینک حرکاتی ترغیب ایدیلیور وانکلیر خارجیه نظارتی بالقان  
حکومتلرینه قارشونفوذینی تأییداً اونلری دائماً تورکلره قارشى تصاحب

علیه نك دائره سنده اولغله اداره مصریه نك دولترلرله طوغریدن طوغری به مناسبات  
رسمیه سی اولماسی بالاده بیان اولنان فرمان عالیرله صراحة قرار کیر اولمشدره  
بوجه تلرجه مصره دائر خارجاً برایش اولسه آنك دولت علیه معرفتی و اوروباده  
اولان سفراسی وساطت رسمیه سی ایله سویلشاسی اشبو قرارک نتیجه قطعیه سیدره  
فالما ٥ صفر ١٢٨٤ تاریخنده تسطیر بیوریلان فرمان عالیده مندرج اولان  
رخصت سنیه موجبنه لدی الایجاب اجنیلر ایله مواد معینه اوزرینه یاپیله بیله جک  
مقاولات مخصوصه نك عائد اولدیغی دوائر اجنیه به بعض ایضاحات ویرمک وعقد  
اولنه حق تنظیمات مخصوصه غیر رسمیه بی مذاکره ایتک اوزره بر مأمور ارسالی  
اقتضا ایدرایسه اول مأمورک دخی کیتدیکی یرده بولنان دولت علیه سفیرینه  
مراجعت ایتسی ومأمور اولدیغی ایشک مذاکره سنه آنك دلالت رسمیه سی ایله  
مباشرت ایلسی غایت آسان وموافق حقوق ومصلحت اولور .

اهالینک امنیت جان ومال ومحفوظیت عرض وناموسنه عائد اولان قوانین  
اساسیه به کوچک بیوک کافه مأمورینک زیاده دقت ایتلری صحیحاً فوق الغایه  
مطلوب هایون اولدیغندن اولبابده تحریر بیوریلان تأمینات دخی بشقه به محظوظیت  
سنیه بی موجب اوله رق شو امرخیرک آن بآن ایلرولسنه صرف یارای اهتمام  
بیورلمسنگ وحجاج مساهمینک بوسنه مصر طریقله عودتلرنده دوچار اولدقلری  
سقات وضرورتک تجدیدی جانب داوریلرندن دخی تجویز بیورلمیه جفندن بو حالک  
عدم تکررینه واولبابده خلاف رضا وانسانیت حال وحرکتده بولنان مأمورینک  
مسئول طوتلرینه هم جالبه خدیوانه لری درکار اولمسنگ علاوه سی دخی فرمان  
بیورلدى .

جناب سامی داوریلرینی جمله مر بودولت علیه نك اعظم ارکانی بیلدی کمزدن  
ولی نعمت بیمنت مز افند مز حضرتلرینک حقوق مقدسه لرینک خللدن وقایه سی وزیر  
اداره علیه لرنده بولنان مملکت پادشاهینک ا کمال معصوریت وامنیتی موجب  
اوله حق مواد محرره نك تماماً وکاملاً اجرالرینه تشبث برله هر درلو یا کاشاقلرک  
محو وازاله سنه همت ومسارعت بیوره جقلری مجزوم عالی حضرت ملوکانه اولدیغندن



ایلیوردی . بیوک بریتانیانک بومعکوس سیاستی اک زیاده ۱۸۹۵ ده  
کندیخی کوسترمکه باشلادی وایشی آتیده بیان اولنهجنی اوزره تورکیه نك  
مقاسمه سنی درپیش ایتمکه قدر کوتوردی .

دیمک که برلین معاهده سندن بری لوندرده توالی ایدن حکومتلرک  
اتخاذ ایتدکلری طریق سیاستک نه قریم محاربه سی اثناسنده کی انکلیر  
سیاستی ایله نه ده ۱۸۴۰ - ۴۱ سنه لرنده لوندره مقاوله لرینک عقدی  
هنکامنده جاری اولان فکر مخادتپرورانه ایله علاقه سی واردی .

انکلیر پولتیقه سنک قطع ایتدیکی مراحل مختلفه وبو پولتیقه نك  
اقتدار جهانده صورت انکشافی بیوک بریتانیانک شرقه دائر اولان  
منویاتی واضحا کوستر و دولت عثمانیه قارشی اتخاذ ایلدیکی مسلك  
حقنده معیار صحیح تشکیل ایدر . بنابرین انکشافی تدقیق ایدم :

انکلتره ، اوزون مدت - کندینه منسوب بر رجل سیاسینک  
تعبیرنجه - شعشعه دار بر تجرد سیاسی ایچنده بولندیسه ده بو ائشاده  
بعضا آلمانیا به توجیه سیاست آرزولرندن ده خالی قالمادی . آنجق کرک  
قیصرک و کرک دیپلوماتلرینک انکلتره به قارشی عدم اعتمادلری حسیله  
وایمپراطورک ده بعض کونه اطرادسزلقلری طولایسیله بوامیه حصوله  
کله مدی . [۱] نهایت انکلتره فرانسه به تمایل ایتدی ؛ فرانسه دخی ،

اولبایده دها زیاده تفصیلاته حاجت کورنمديکنک وبوطرفی تشریف تصمینده  
اولدقلرینه متدائر اولان اشعار داوریلری دخی مقبول عالی اولوب شوشیلرک  
حصول حسن تسویه سیله برابر ذات فغامت سمات داوریلرینی کوروب بقای  
توجهات عالییه کی کوسترمک موجب ممنونیت سنیه اوله جفتک بیانیه بااراده سنیه  
ترقیم عریضه به مبادرت قلندی . اولبایده امر وقرمان حضرت من له الامر کدر .  
[۱] Frh. V. Ehardstein. Les. u Pol. alemkw صحیفه ۲۱۲ -



۱۸۳۲ء ده اولدینگی کبی انکلتزه ایله ۱۹۰۳ - ۱۹۰۴ ده آنتانت قوردیال Entente Cordiale تعیر ایتدکری ائتلاف مخالستکارانهک عقدی ضمنده معهود فاشودا کچمیشنی مع الممنونیه فراموش ایلدی . وقتا که اوندن برسنه صکره ظهوره کلن روس - ژاپون محاربه سی ، چار اردولرینک انهزامی و روسیه نک اقصای شرقه دائر مدعیاتنک افلاسی ایله نتیجه لندی . انکلیز - روس مناسباتنده کی کرکینلک ده زائل اوله رق دولتین بینده ۱۹۰۷-۱۹۰۸ ده تیبِت ، افغانستان ، ایران و حتی شرق قریب مسئله لری حقنده کی سلسله ائتلافاته یول آچدی . ایشته بوصورتله بیسار قک اک زیاده قورقدینی حال یعنی آلمانیا نک بالجمله مضافاتیه برابر چنبر آلتنه آلتنی کیفیتی خیز حصوله کلهرک اون طقوزنجی عصرک صوکلرنده ، اوزمانه قدر نفوذ مجادله لری و مستملکات استرقاباتیه مبین بولنان انکلتزه و روسیه و فرانسه نک یکدیگریله ائتلاف و مقارنتلری کورولدی . اشبو مقارنتک اوکنه کچمک واوروپائی براتفاقه محور اولق اوزره آلمانیا نک صرف ایتدیکی مساعی ایسه مشر اوله مدیغندن حصول بولان منظومه سیاسییه بی تغییر ایده مدی . روسیه ایله مخادنت ، فرانسه ایله ده مقارتی موجب اولور امیدیه برلین سیاسیوننک پترسبورغه قارشى ابراز ایتدکری مخالست و روسیه - ژاپونیا محاربه سی اثناسنده تأسیس ایتک ایتدکری بنای موالات ، آوستریالینک متفق بولنان آلمانیا حقنده موسقوفلرک بسلدکری اعتمادسزلی کیدره مدی . نته کیم ۱۸۷۱ ده غالب کلوب استفاده خصوصنده مهارت سیاسییه ابراز ایده میان دشمنلری حقنده فرانسرک حس ایلدکری کراحت دخی ، الساس - لورهن مسئله سی دائم اولدقجه - زوال بوله مزدی . انکلتزه نک ایسه اوروپا قطعه بریه سنده کی اشبو شقاق و اختلالدن

استفاده ایده بیه جکی در کار ایدی . بناءً علیه بوئرلرله اولان حربده  
ظفریاب اولان انکلتره کندی محرکنه اولاً فرانسه یی و صکره ده  
روسیه یی جذب ایتدی و ژاپونیا ایله اولان اتفاقیه رغماً آمریقا ده دخی  
تأسیس نفوذ ایتمه نك یولنی بیلدی .

اشبو موفقیتلر یوزندن اکتساب قوت ایدن انکلتره ایچون آرتق  
آلمانیا یه طوعاً و یا کرهأ قبولی ایتدیر یله جك شرائط ائتلافیه سایه سنده  
جرمن تهله کهنك اوکنی آلمقدن بشقه یاپه جق برشی قالمامشدی . برلین  
ایسه بوندن غافل دکلدی ، و ایکنجی ویله مک متار کدن صکره نشر  
اولنان مکتوبلرینه نظراً مشارالیه ک ساده دلانه فقط متادی صورتده  
روسیه ایمپراطورینی کندی محرکنه جذبیه سعی ایتش اولدینی اکلایشیلر .  
حال بوکه آلمانلر ، بو تشبثلرنده موفق اولمقدن بشقه زمرة ائتلافیه یه  
انجذاب حسنی طویان ایتالیا ن متفقلرینك بیه صداقتنی تأمین ایده مدیلر .  
دول ائتلافیه بر درجه به قدر اوچنجی ناپولیون کبی مرکزی  
اوروپانك ، شرق قریبک ملیت اساسنه ابتناء یکیدن تشکیلی دستورینه  
اتباع ایدیورلردی . بودستورک معناسی ایسه کرك آوستریا - مجارستانك  
و کرك دولت عثمانیه نك انحلالی اولسه بیه شکلاً بر تغیر تامی ایدی .  
فرانسه و انکلتره پان روس جریانلرینك آرتق تهله ک و اهمیتی قالمدیغنه  
ذاهب اولدیغندن بودرلو برسیاسته سلوک ایتک ایچون مانع کور میورلردی .  
فی الحقیقه بالقانلرده و آوستریا - مجارستانده متمکن اسلاوملل مختلفه سنك  
اکثرنده تبلر و تأید ایدن حسیات ملیه ، آتیا بو عناصرک اختلال  
تهله کلرینه معروض بولنان مطلقیت پرور روسیه نك نفوذ و تحکمنه تحمل  
ایده بیلملرینه احتمال براقیور ایدی . پانسلاویزم ایله پان روسیزم ،  
آرتق کلمات مترادفه دن دکل ایدی . بوندن صکره آوستریا و یاخود بالقان



اسلاولری قوه قدسیهیه مستند بولنق کبی واهمهله تابع بر روسیه چارینه دکل ، غریبه ، غرب مدنیته متوجه ایدیلر ؛ خصوصاً که لدی الحاجه آوستریا - مجارستانک ضررینه اوله رق بیویه جک اولان بر رومانیا ، کذا دولت عثمانیه خسارینه اوله رق حد اعظمییه وارهبیله جک بریونانستان ، لزومنده اسلاولغه قارشى - بلا واسطه تدبیرلردن قطع نظر - استعمال ایدیله بیله جک برر مهم قوت تشکیل ایدهبیلرلردی . شو حالده اک اساسلی شیء ، شمال وجنوب دکنزلرنده مخرجلره مالک و اوروپانک اورتہ سنده کمال قوتله حائز موقع اولان یوزمیلیونلق برجرمن کتله سنک اقتصادى ، سیاسى و بحرى تهلیکه سنی اورتہ دن قالدیرمق ایدی . فی الواقع بو چالیشقان ، حریص و طول امل صاحبی کتله ، رقیبلرینی اندیشناک ایتمکدن خالی قاله مز ایدی . روسیه نك بحرسفیده سربستیء مروره دائرمدعیاتی نظر اعتباره آلتق شرطیله بودولت آلمان انکشافنه سد چکبیله جک موقعده ایدی . بر دیگر طرفدن ایسه انکلتره ، چناق قلعه بوغازینک بالواسطه فقط اولدجه مؤثر برکلیدی عد ایدیله بیله جک اولان کرید آطه سنه ۱۸۹۸ دن بری هلال عثمانی یرینه یونانک مائی بیاض بایراغنی قائم قیلمش ایدی ، وسوده لیمانی ده انکلتره نك بحرسفید شرق حوضه سنده کی دونماسی ایچون براس الحریکه اولمش ایدی ؛ بناءً علیه انکلتره نك روسیه دن چوق قورقوسی قالماش ایدی .

انکلتره عربستانده ، بریه الشامده وعراقده کی مساعیء متوالیه سنک ثمراتی متزاید بر حالده کوردکلرندن بومملکتلری کندی نفوذلرینه تابع اولمغه محکوم عد ایدوب لزومی تقدیرده تا افغانستانه قدر عرب حکو - متلرندن مرکب برانکلیز سدی تشکیل ایتک و برآ برانکلیز دمریولنک سهولتله بحر سفیده ربط ایدهبیله جکی هندستانه طوغری هر هانی



بر نفوذ مخالفه قارشى موانع احداث ايده بيلمك امكانى ده حاصل ايتدكلرينه  
 ذاهب ايديلر .

شونى ده علاوه ايدلم كه پيشه سى جهان سياستك محورى اولمق  
 ايستيان انكلتره ، آلمان يادن آيرمق ايستديكى آوستريايى ده اونو تمامش  
 ايدى . نه متوفى يدنجى ادوارك مارينباد سياحتلى نده بشنجى  
 ژورژك ۱۹۱۳ ده كى ايشيل زيارتى اسباب صحيه دن نشأت ايتديكى ده  
 اوزمانلر معلوم ايدى . ينه بوپيشه اقتضاسندندر كه انكلتره ، اسكى بر  
 اتفاقك تجديدى سايه سنده پورتكيزى چوقدن برى كنديسنه ربط ايتش  
 واسپانيا ايله ده بحر سفيد و بحر محيط سواحلنده كى آفريقا ممالكنه دائر  
 خصوصى استلافلر عقد ايتك صورتيله جبل الطارقك اطرافنده كنديسنه  
 حاكم بروضعت تايمين ايلش ايدى .

اواثالرده انكلتره نك شمال دكزنده آلمانياه قارشى تفوق بحريسى  
 محافظه غيرتى ، بحر سفيدده كى موقع معنويسنى ده غائب ايتمكه قاتلانهميان  
 بودولتك اوراده كى دونماسنى تدريجاً ضعيف درشورمكده ايدى . او  
 وضعيته نظراً انكلتره نك بحر سفيدده كى نفوذينك له ويا عليهنده كى  
 قوتلرك موازنه سنده دولت عثمانيه قوتنك انضمامى حائز اهميت  
 اوله بيلوردى . كرك تورك ، كرك انكليز منافعى نقطه سندن مع التأسف  
 منفى بر رول اوينايان سلطان عبدالحميد حكومتى انكلتره نك كنديسيله  
 تأسيس روابط ايده بيلمسى وهيج اولمزسه كنديسنه ايلشامسى ايچون  
 لازم كلن شرائطى حائز اوله ميور ايدى .

دولت عثمانيه نك غير قابل اجتناب سقوطنى لورد ساليسبورى يه  
 چوق اولدن كشف ايتديره ن سياسى خطالر ، سوء اداره لر و قانلى  
 توركيا-آلمانيا : •



فاجعه لرانکلتزده دولتمز علیهنده بوتون فرق سیاسیه نك غیض ونفرتی جلب ویا تایید ایدیوردی . بونسکه برابر اعتراف ایدملیدرکه بیتون بو احواله رنمأ انکلتزه ۱۸۸۷ده مقدا عقد ایتدیکی قبریس معاهده سنی در خاطر ایدوب روسیه قارشی باب عالییه دست وفاق اوزاتمقدن کیرو قالماشدی . فی الواقع اوصرده روسیه نك بلغارستان اداره سنه متعلق مداخله سی، اوچ بحرسفید دولت معظمه سی آره سنده ، یعنی انکلتزه ، ایتالیا ، آوستریا بیتنده براتفاق خفی عقدنی استلزام ایتمشدی . شو جهت دخی شایان تذکاردرکه سلطان عبدالحمید اداره سنه خصومت کامله بسلیان انکلتزه ۱۹۰۸ مشروطیت عثمانیه سنك فردای اعلاننده سیاستنی بالتبديل خیر خواهانه بر انتظار مسلکی اختیار ایلشدی و باب عالی ، بر هیئت بحریه اعظامی ایچون کن دیسنه مراجعت ایدلدکده بونی قبوله مسارعت ایدرک منتخب ضابطانندن مرکب برارکان حربیه ایله برابر آمیرال قامبل Camble ی استانبوله کوندرمشدی .

تورکیه ده کی انقلاب اداری ، بعض لوندرو محافلنك کواکشمش تورک خصوصت لرنی تمامیه ازاله ایده مامش ایسه ده ینه حق مزده حسن جریانلر تولیدندن کیرو قالمامش و آمیرال قامبلنك پک یقین اقربامدن برذاته سویلدیکنه کوره باب عالی ایله سیاسی و بحری بر مشارکت زمینی احضاری انکلیز لرنجه موضوع بحث اولمشدر . مشارالیه آمیرال دیمش که : « تورکیه ینه متوجهاً حرکت ایتدن اول قرال یدنجی ادوارک حضورینه چیقدم . قرال ولی عهد لکی زماننده پارسه صیقجه کلیردی . بنده اووقت فرانسه ده آتسه ناوال ایدم و کن دیسیله ده کوروشوردم . بناء علیه بنی پک صمیمی بر صورتده قبول بیوردی . بو مأموریته انتخابمندن طولانی پک ممنون قالدیغنی سویلدکدن صکره دولت عثمانیه نك قوتلی بر دونماید مالکیتی

بزم ایچون ملتزمدر؛ زیرا اوسایه ده انکلتزه بحر سفیده دیگر دولتره قارشى تفوق بحرى بی محافظه ایدم بیلیر. بومقصدی استحصاله چالیشکز. کرک استانبولده، کرک بوراده مشکلاته اوغراسه کز طوغریدن طوغری به بکا بیلدیریکز، بنده سزه قوه الظهر اولورم. « دیدی. استانبولده ایسه وظیفه می ایفا خصوصنده پک مشکلات و موانعه معروض قالدیم. تورکیه نك کندينى قورومق ایچون هرشیدن اول بردونمايه محتاج اولديغنى کیمسه يه کلاته مدم. مفتوراً ترک خدمت ایتدم. ذاتا انکلتزه نك سزه قارشى سیاستی ده آرتق دکیشمش ایدی.

ایشته کنج تورکلرک عدم استطاعت سیاسیه لری و وضعیتک ایجاباتی و فوائدی درپیش ایتک خصوصنده کی لیاقتسزلیکری یوزندن دور سابقک سقوطی سایه سنده ظهوره کلن فرصتار و تحسنلر هدر اولوب کیتدی. فی الحقیقه جهان سیاستنک انکشاف فوق العاده سی و صوک سنه لرده کی احتمالات سیاسیه نك تکثر و تنوعی اویله وضعیتلر احداث ایتشدی که تورکیه نك منظومه دولیه داخلنده و کندی موجودیتی ايله قابل تألیف صورتده بر موقع مخصوص اخذ ایلمی قابل و درست بر مسلك تعقیب ایتک شرطیله انکلز لیرالریله بیله اوزلاشمه سی مأمول ایدی؛ ذاتاً ۱۸۴۰ و ۱۸۴۱ ده لوندرده عقد اولنان و سلطنت سنیه نك استقلال و تمامیت ملکیه سی ضامن بولنان مقاوله لرکده بره وویغ یعنی لیرال حکومتنک اثری اولدینی اونودلما لیدر. انکلتزه نك ۱۸۹۲ ده سلطنت حمیدیه ايله تأسیس مخادنته راغب اولمسی و ذات شاهانه یی کنیدلکندن ولایات شرقیه ده مهمامکن اصلاحات اجراسنه تشویق ایتک اوزره استانبولده کی انکلتزه سفیری سرفلیپ کورری Sir Ph. Currie یی نزد پادشاهیده تشبثات محرمانه ده بولمغه مأمور ایلمی دخی بر لیرال حکومتنک



زمانه مصادف در . اوزمانلر انگلیز افکار عمومی سنی اغصاب و دولت عثمانیه ایله هر نوع مقارنتی منع ایدن شو دیکنلی مسئله نك برطرف ایدلسی لوندره جه پك ملتزم ایدی . فقط ایجابات سیاسیه دن زیاده خفیه کروهنك تلقیناتی نظر دقته آلان سلطان عبدالحمیدك تعندی ، انگلیز دیپلوماتلرینك مساعیسنی ثمره سز بر اقدی . حتی بوکبی تشبثات عقیم قالدقن ماعدا ۱۸۹۷ ده پایتخته بیه برچوق قتالار وقوعه کلدی .

بر نتیجه معقوله استحصالندن نومید قالوب منزع اولان سرفلیب کورری ایله فرانسز سفیری موسیو پول قامبون ، دولت عثمانیه یی بر اداره مشترکه دولیه تختنه وضع ایتمکی تکلیف ایتدیلر . حتی سلطان عبدالحمیدی اسقاط ایچون کنج تورکلری صحابت ایلمکی بیه ملاحظه ایتدیلر . انگلتره باش وکیلی لورد روزبری Rosebery مشارالیهما سفیرلرک تکلیفلرینی بالترویج قاینه لر نزدنده محرمانه تشبثاته قویولدیسه ده اوسایه ده انگلیزلرک استانبوله یرلشملری احتماله نظرأ روسیه اوکبی تکلیفله یناشم دینی کی فرانسه خارجه ناظری بولنان موسیو هانوتو M. Hnotaux دخی اونوع حرکاتدن تولد ایدم بیه جک قاریشقلقلردن و حرب تهله که سندن چکیندی . بو صورتله انگلیز لیبرال قاینه سنك تشبثاتی عقیم قالدی . برمدت صوکره محافظه کارلر ، باشلرنده لورد سولسبوری اولدینی حالد روزبری قاینه سنه خلف اولدیلر سده سولسبوری دخی تورکلره قارشى مساعد طاوراندی . بوذاتک قبریله سلطان تسمیه ایتدیکی سلطان عبدالحمید علیهنده کی آتشین بیاناتی هنوز اونودیلما مشدر . دولت عثمانیه ؛ ۱۸۹۷ ده یونانستانه قارشى احراز ایتدیکی مظفریت اوزرینه قدیمأ برولاتی اولوب اشغال عسکری آلتنه آلدینی تسالیانك محافظه سنی طلب ایلدیکی زمان مذکور لورد پارلمنتوده

« صلیبه کچن شی ، بردها هلاله اعاده اولنه ماز . » دیه درشت بر افاده ایله تورکیه حقننده کی کین و غیظنی علناً اظهار ایتشدرد .

مقدما آلمانیا نك لوندره سفارتی مستشارلغنده بولنش اولان بر ذات ، بارون فون نه قاردشتاین Eckardstein ، شایان دقت بعض افشا آتده بولنش وافاداتی تایمس مخبری سور شیرول Chirol [۱] طرفندن تأیید ایدلمش ایدی . بوافشا آته نظراً لورد سولسبوری ۱۸۹۵ سنه سنده تورکیه نك مقاسمه سنی تکلیف ایتشدرد . فی الواقع ایمپراطور ایکنجی ویلهلم قوطره یاریشلرنده بولنق اوزرم قووس Cowes . کیتدیکی ائنده قرالیچه ویقتوریا لورد سولسبوری ایچون ایمپراطوردن برملاقات طلب ایلش و مشارالیه ۸ آغستوسده هوهرنولرن یاطنده انکلتزه باش وکیلنی قبول ایتمش . بوملاقات ائساننده لورد سولسبوری ، تورکیه نك انکلتزه ، آلمانیا ، اوستریا بیننده مقاسمه سنی تکلیف ایلش . [۲] فقط ایمپراطور ، وقتیه لهستان حقنده یاپیلوب مرتبلی ایچون تاریخ مواجهه سنده شین تشکیل ایدن مقاسمه یی آندیران بو تقسیمه اشتراکی رد ایلشدرد .

ایکنجی ویلهلمسک جواب ردینی نه قاردشتاین کتابنده شدتله تنقید ایدیور و بونك قورناز آلبیونه Albion . قارشى عدم امنیتدن منبعث اولدیغنی افاده ایدیور ؛ فقط شاعر اعظم کوته نك وطننده امپریالیزم دستورلرینك تقدیر حکمفرما اولمغه باشلادیغنی کوسترمک ایچون منقده

[۱] تایمس غزته سنك ۱۱ ایلول ۱۹۲۰ تاریخلی نسخه سنده کی ( سابق قیصر وانکلتزه ) عنوانلی مقاله .

[۲] نه قاردشتاین ك ۱. 212-13 pol. Lebens. ris. & pol. Denkwü d . نام آری .



سوسیالیست رئیس به بل ۱. Beb. • بو وقعه یی حکایه ایتدیکی صروده به بلك سویلیدیکی شوسوزلری تکرار ایدلم :

« اکر ایش حقیقه سزك دیدیککز کبی ایسه کرک ملی ، کرک کرک اجتماع نقطه نظرلردن هم ایکنجی ویله لم هم ده مشاورلری آسيلمغه لایقدرلر ! » یعنی آلمان سوسیالیستک فکر نجه تورکیه تقسیم ایدیلمی ایمش !

آلمانیا خارجیہ نظارتی رجال ممتاز سندن بری طرفندن بالتالیف صوک زمانلرده نشر اولنان بر اثر ده ده بو مسئله حقنده شو تفصیلات واردر [۱] : « مارکی سولسبوری رأس کاره کلنجه آلمانیا سفیری قونت هاتسفلد Hatsfeldt ایله اولان ملاقاتلرنده ، دولت عثمانیه نك ایرکچ انحلالی و نتیجه ده بین الدول مقاسمه سی طولایسیله انکلتزه ایله آلمانیا آره سنده بوبابده بر مقاوله عقدینی موضوع بحث ایتشدر . اوتقیدرده ایتالیا ، احتمال طرابلس غربی آلهرق صومالی ساحلنده وارناوودلق طرفنده دسترس اوله مدینی آمالنی تضمین ایده بیله جگدی . قونت هاتسفلد ، برلیندن آلدینی تعلیماته بناء آلمانیا نك ، هرایکی متفقنك ده آدریاتیق دکزینه متعلق مخالفتلرینی تشدید ایتماک ایستدیکنی وبالقان مسائلی قاریشدرلدینی حالده آلمانیا نك روسیه ایله اولان دوستلنی قولایلقله اخلال ایدلمش اولاجغنی سولشدر . سالیسبوری بوکاجواباً تورک میراثندن روسیه یه بیوک بر حصه آیرمغه حاضر اولدیغنی بیان ایلشدر . اشبو محاورات محرمانه ، مطالعات عمومیہ زمینندن خارجه

[۱] هامان Hamman . نك : (یاکاش آکلاشامش یسمارق) نام اثر نك

ترجه سندن صحیفه ۴۳ - ۴۴ برلینده ۱۹۲۱ ده مطبوعه در .

چيقيمامش ايسه ده ۱۸۹۵ ده قووس قوطره ياريشلري سببيله ايمپراطور ايكنجي ويلهلمك انكلتره ده كي اقامتي ائناسنده ساليسبوري توركيه نك حال پريشاننه دائر نقطه نظريني قيصره عرض ايله دولت عثمانيه نك هورروسه اولان وضعيت داخليه سندن بحث ايتمشدر . فقط ايمپراطور ، يواش يواش توركيه ده احوالك صلاحه طوغري انكشاف ايدم جيكي فكرنده بولتمشدر . ايمپراطور ويلهلمك بو اميد و افاده سي - قونيه يه قدر اناطولي قسمي همان همان اكال ايدلمش اولان - بغداد شمندوفرينك انشا ايدلمكده اولماسندن متولد بولنديغنه حمل ايتمك جائزدر .

ايشته كوريليور كه انكليزلر عصر اخيرك صوكرينه طوغري ارمني قتاللك مسئولى عد ايتدكلري و طور و مشواريله انسيت ايدم مدكلري سلطان حميد تركيه سيله حسابي كيشيمكه عزم ايتمشلر و مشرق مسئله سني تسويه ايتمكه قرار و يرمشلردى ؛ لكن انكليز - آلمان مناسباتي كيت كيده كر كينلشديكي جهته انكلتره خارجيه نظارتني تبديل وجه ايدوب ۱۹۰۸ ده عثمانلي ايمپراطور لغنك مقاسمه سي ايچون ره وال ملاقاتيله روسيه ايله آكلاشمق ايستدى .

آلمانيا ايمپراطورينه كلنجه ، مشاراليه جرمن منافعني تأميناً - سلطان عبدالحميد قارشى ابراز ايلديكي معامله محادنتكاريدم دوام ايلدى . فقط مائل انهدام اولان بنای عثمانينك مقدراتنه لزومندن زياده اشتراك كن ده متوقى بولندى . مثلاً ارمني قتالندم برلينجه ابراز اولنان تائيدن جسارت آلان سلطان عبدالحميد ، دول غريبه نك وضع مهردادانه سنه قارشى آلمان يادن فعلاً استعانه يه قالقيشنجه آلمانيانك بو ايشده تدابير تضيقيه دن اجتناب ايتمش اولمسي بر جيله بيله رك بو قدرله قناعت ايتمسي باب عاليه



بیله یرلدی . فی الواقع اوزمانکی آلمان سیاستی ، بیسهارقک برلین مه موراندومی هنکامنده کی سیاستیله مقایسه ایدیلنجه له مزه انکشاف ایتمش و برمسلك خیرخواهی تعقیب ایلکده بولنمش اولدینی کوریلور . آلمانیا سیاستنک تورکیه له نه اولان شو حسن تحولی ذاتاً بیسهارق زماننده باشلامشیدی . مشیر غازی احمد مختار پاشانک ۱۸۸۳ ایلولنده مأموریت مخصوصه ایله برلینه عزیمتده ده خیلی ایلرولمش بولنیوردی . غازی مشارالیه ، فریدیریکسروهده پرنس بیسهارقک مسافری اوله رق کندیسيله مدید ملاقاتده بولندیغنی ائشاده بیسهارق ، تورکیه نك اعاده قوت ایتسیچون وصایاده بولنمش وایمپراطورک تورکیه یه برهیئت عسکریه اعزامی و پروسیا اردوسنه تورک ضابطلری قبولی صورتیله ذات شاهانه یه قارشی بیوک بر خیرخواهلق ابراز ایتدیکنی سولیشیدی .

مصر مسئله سی حقنده ده باب عالینک اشبو خطیه تمامیه وضع ید ایتک ایچون اک ایی فرصتلی قاجردیغنی وبومسئله یی حل ایتک ایچون آرتق انکلتزه ایله طوغریدن طوغری یه اوزلاشمقدن بشقه چاره قلمدیغنی بیان ایلوب بحرسفید موازنه سنده و مصرده طوغریدن طوغری یه علاقه دار فرانسه ایله بو باده تشریک مساعی ایدلسنی توصیه ایتمش و آلمانیا نك کرک مذکور موازنه ده ، کرک مصرده علاقه سی اولمدیغنی آ کلاتدقدنصکره ایتالیا نك ده اهمال ایدیلامسی لازم کلدیکنی علاوه ایتمش ایدی .

اشبو ملاقاتلر ائشاسنده اک زیاده جالب دقت اولان نقطه ، غلادستون حکومتنه رغماً انکلتزه ده تورکیه له نه تبلر ایدن تمایلات حسنه دن استفاده ایدیلک اوزره بیسهارقک متادیا تشویقاتده بولنمسی در . بیسهارق ، انکلتزه نك بالقان پولتیقه سنک روس آمانه مخالفتدن و بالعکس باب عالینک

منافعه موافقتن بختله تورکیه نك انکلیز لرله حسن مناسباتده بولمسنده کی  
فواندی بسط ایتشدیر . برلین معاهده سی ایجاباتدن اولان ارمنستان  
اصلاحاتی حقنده کی استمزاجه جواباً بیسمارق ، ارمنستانی بعض  
جهتلرجه لهستانه قیاس ایدوب اوراده بلغارستانک طورینی طاقینه بیله جک  
بر مختاریت اداره تأسیس ایدلامسنی مصرانه توصیه ایشیدی [۱] .  
بیسمارق تورکیه ایچون توصیه ایتدیکی انکلتزه دوستلغنه کندیسیده دایماً  
متوسل بولنیوردی . بیسمارقک انکلتزه یه میلی آلمانیا نك مصر مسئله سنده  
اتخاذ ایلدیکی وضع ایله تظاهر ایدیوردی . ۱۸۸۵ ده بیسمارق رایخشتا  
غده کی بیاناتی صرہ سنده انکلتزه طرفندن مصرک طرز اداره سی  
و اوراده انکلیز اشغالنك ادامه سی حقنده واقع اولان بر استمزاجه  
جواباً انکلتزه یه ، اشبو مملکتک بین الملل معاهداتدن انحراف اولمق سزین  
پادشاه نامنه اداره ایدیلسنی - سهل التطبيق بر طرز تسویه اولمق اوزره -  
توصیه ایتدیکنی سویلشیدی . بیسمارقک بو بیاناتی ، نه کندیسنك  
۱۸۸۷ ده درمیان ایلدیکی خصوصی مطالعات ایله مقایسه ایلک فائده دن  
خالی دکدر . مشار الیه او تاریخده دیمشیدی که : « مصر بزم ایچون  
هیچ بر وجهله جای علاقه دکدر و مناسبات بین المللمزی کندی  
دلخواه مزه اویدیرمغه وسیله اولمقدن بشقه بر شیئه یراماز . بونی بزم  
دیپلوماتلر مزل قفا سنه نصل صوقه لم ؟ » [۲]

بونسکله برابر الاستیقت معروفه سی ایجابجه بیسمارق سیاستی

[۱] سلطان عبدالحمید ثانی به غازی احمد مختار پاشانك ۲۸ تشرین اول

۱۸۸۳ تاریخلی لایحه سنندن .

[۲] ( نه قاردشتاین ) دن



بر آره لق بزه قارشى ده صوك درجه موافق كىتمكه باشلامشى .  
شويلاه كه :

۱۸۸۷ ده روسيه چارى ، جنرال قاوولبارس Kaulbars كې  
روس ممثللى وياخود جنرال نوره نروت Fh enroth هيئتى كې صورت  
مخصوصه ده صوفيه ده بولندىردىنى مامورلر واسطه سيله بلغارستانى كندى  
آرزوسنه كوره اداره ايتك ايستمش اولمى ايتاليا ، انكلتره و آوسترياده  
اندیشه يى موجب اولمشدى . پرنس آلکساندر باتمىرغك روس طرفدارى  
اولان فرقه طرفندن خلغندن صكره بلغار تخته جلوس ايدن پرنس  
فردىناند قوبورغك دخى مقامى مدت مدیده محافظه ایده بيله جكى تخمین  
ایدیله مامكده ایدی ؛ زیرا روسلرک تأثیراته تبعاً سلطان عبدالحمید دخى  
مشارالیه پرنسك انتخابى تصدیقن مجتب و بلغارستانك شكل ادارىسى  
بمخنده روس نقطه نظرينه ملتفت بولنیور ایدی . روسیه نك بالقانلره  
و بحرسفیده طوغرى تجاوزىنى منع ایچون انكلتره ایله ایتالیانك امرجه  
و تمایلاتندن استفاده ایتك ايسستیان بیسارق ، ۱۸۸۷ تشرین اولنك  
بدایتنده موسیو قریسىنى فریدریقسروهیه دعوت ایدیور و اونكه  
توحید نظر ایتدكن صكره ده شرقده تعقیب اولنه جق سیاست حقنده  
اوزلاشمق اوزره لورد سولسبورى ایله مخبریه کیریشه رك ۲۲ تشرین  
ثانى ۱۸۸۷ تاریخنده یازیوردی كه : « روسلره قلیچلرینی قینلرندن  
چیقارتماق و شاید الجای وقایعه ایپ قوپه جق اولورسه مدافعه  
اولنیه بیلیمك اوزره شرقده بزه عائد اولمیان منفعتلری مدافعه ایده جك  
اولان دول متحابه نك مشترکاً و قوه عسکریه لری سایه سنده حاز  
قدرت بولنلرینی تمی ایلرز . اورالرده هیچ برآلمان منفعتی موضوع  
بحث اولمدقه بز بیطرف قالیرز ؛ فقط کرک روسیه ایله آرامزده

بر محاربه نك تجدشہ مانع اولمق، كرك اويله بر احتمالہ قارشو كوكس  
كريم بيلمك خصوصندہ بزه ظہیر اوله بيله جك دولترك روسيه طرفندن  
مغلوب و دوچار ضعف ایدیلمسی ایچون بر آلمان ایمپراطورینك روسیه  
معاونندہ بولمسی هیچ بر زمان وارد خاطر اوله مز. [۱].

لورد سولیسبوری ده ۳۰ تشرین ثانیدہ شویله جواب ویریوردی :  
« اكر سوء طالعہ فرانسہ و آلمانیا آره سندہ بر حرب ظهور  
ایده جك اولورسه بر روسیه ، آلمانیا علیهندہ هیچ بر حرکت خصمانه ده  
بولمز ، فقط بالقان شنبه جزیره سندہ و آسیای صغرا ده بعض نقاطه  
وضع یدایدہ رك کندیسنی قره دکز و چناق قلعه بوغازینه حاکم قیله جق  
صورتم ذات شاهانه دن امتیازلر قوپاره بیلیر. یالکر شووارکه روسیه  
قوتلی بر مقاومت قارشو سندہ بولنه جغنی بیلورسه عجیبا بویله بر  
تشبندن واز کچرمی ؟ روسیه نی تصورلرندن صرف نظر ایتدیرمکه ایتالیا  
ایله انکلتزه کافی دکلدر . انکلتزه نك ایتالیا دن ماعدا متفق بولمز ایسه  
انکلتزه افکار عمومیه سنك تورکیه ایچون حربہ قیامه رضا داده اولمسی  
مشکوکدر . بناء علیہ بو ایش آوستریانك آله جنی وضعیته باغلیدر ؛  
حال بوکه آوستریا ، آلمانیا نك مع و نندن امین اولمدیجه روسیه به اعلان  
حرب ایده میه جکندن و انکلتزه ایله ایتالیا نك کندیسنه اوراده یاردیم  
ایده بیلملری پک متعسر اولان سمال شرقی حدودندن واقع اوله جق  
بر تجاوزه قارشو کله میه جکسندن یرنده راحت اوطوره رق عثمانلی  
طوپراغندن تعویضات آلمنی ترجیح ایلر . ذاتاً آوستریا بو طرزده  
سیاستدن اولجده استفاده ایتشدیر . کرچه محقق اولوب اولمدینی  
معلوم دکلسده بو سیاسته آوستریا ایمپراطورینك بالذات ینه متمایل



اولدینی مروریدر . حال بوکه آلمانیاڭ معاوتندن آوستریا امین اولنجه  
 بوسیاستک عکسنی ودها متین برطرز حرکت اتخاذایده بیلیر . [۱]  
 ایشته سولیسبورینک فکرینجه بیسمارق آوستریایه ایستدیکی تأمیناتی  
 ویرملی ایدی که اوده روسیه نك شرقده کی هرتورلو مداخله سنه قارشى  
 کلک اوزره ایتالیا وانکلتره ایله بالاشتلاف حرکت ایده بیلسون .  
 فی الواقع وضعیت بو شکله منجر اولدی . زیرا دمیر شانسلیه دخی  
 بو نظریه یی قبول ایتدی . شو حالده بیسمارق بو اوج دولت میاننده  
 ۱۸۸۷ سنه سی کانون اولنک اون ایکیسندده عقد ایدیلوب خطوط  
 اساسیه سی دول مشارالیه م بیننده سنه مرقومه شباطنک اون ایکیسندده  
 تقرر ایلان اشتلاف مخصوصده ذی مدخل بولنیورایدی . حتی بو اشتلافک  
 بعض ماده لری بالذات شانسلیه طرفندن قلمه آلنشییدی . بو اوج  
 دولت ، آرملرنده تعاطی ایتدکلری نوطه لر اوزرینه شرقده تحدث  
 ایده بیلجه ک احتمالاته قارشى خط حرکتلرینی شو یولده تعیین ایتشلردی :  
 « اوروپا منافع مهمه سنک نکهبانی اولان تورکیه ، هر نوع اجنبی  
 نفوذ متفوقنه قارشى مستقلا در . ( استقلال خلافت ، بوغازلرک سربستیسی  
 الخ ) .

« بنابرین تورکیه ، بلغارستان اوزرنده کی حقوق حاکمیتی بشقه  
 بردولته ترک و یا بشقه بردولته یدوکالته تودیع ایده مز . و بلغارستانده  
 براداره اجنبیه جاری اولمسیچون نه بر توسطده بولنه بیلور ، نه ده بو  
 مقصدله اشغال عسکری شکلنده و یا خود کوکلی اعزامی صورتنده  
 وقوع بوله حق هیچ بر معامله تضییقه اجراسنه مساعدده ایده بیلور .

[۱] دویچه آلکماینه چایتونخ غرته سنک ۱۶ شباط ۱۹۱۹ تاریخی و ۸۰

نومرولی نسخه ندن .

اندن بشقه ده معاهد ملر ایجابجه بوغازلرک دربان بولنان تورکیه، حقوق حاکمیتدن هیچ بری ترک ایدمه جکی کبی آسیای صغرا ده کی نفوذ حاکمیتنی ده بشقه بر دولته احاله ایلیمز .

اشبو اساساتک مدافعه سی ایچون تورکیه نک کندی لرینه التحاق ایتمی دول ثلثه نک آرزو کرده سیدر ..... ، [۱]

۱۸۴۰ - ۱۸۴۱ لوندرو اشتلافلرندن و اونلرک نتیجه سی اولان قریم محاربه سندن بری بویله بر نعمت ، تورکیه یه نصیب اولماشیدی . اوروپانک اک بویوک دولتلری کندی اتفاقنه راغب بولنیورلردی . فقط موسیو قریسی بیسمارقه دییوردی که : « بودولت (دولت عثمانیه) انحلال اوزرهدر و بویوکون یارین مقاسمه سنه ابتدار اولنه بیلور ... اگر روسیه صوک ضربه یی ایندیرمکه مهیا ایسه تورکیه یه وضع ید ایچون اوراده کی قاریشیققلردن پک کوزل استفاده ایدم بیلیر . فقط بو ایش روسیه نک تورکیه یه استیلا سنه قطعاً مساعد ایتاملری کان دول معظمه نک حسابنه الیرمز . بویله بر وضعیت قارشیدسند بولنه جق اولورساق بزه حکومت عثمانیه یی یکیدن اصلاح ایتک و لزومی حالنده ده اونی مدافعه ایتک دوشر . ایشک خلاصه سی ، اونی محو اولمقدن قورتارمق و یا خود او حکومتک یرینه بر ویا بر قاج حکومت قائم اوله جق صورتده براساس ترتیب ایتک در ..... ، [۲]

1 D. pol. Geheimvertr. O. — U. 1879-1914. p. 25 vol. I. publ. par le Dr. Pribram. Wien et Leipzig 1920

« D. Mem. Franc criski's » trd. all. Wichmann, p. 225-26 Brl. 1912 ( trad. )

( 3 D. pol. Geheimvertr. O. — U. 1879- 1914 ) p. 53 vol I. publ. par le Dr. Pribram. Wien et Leipzig 1920



تصريحاً علاوه ايدم که فرانسزجه عبارتهك شيوهسنه نظراً  
اقامه ايديلهك حكومتدن مقصد، توريكه اراضيسنك دول معظمه  
بيننده تقسيمى لزومى افاده ايلك ايدى، نتهكيم زيړده مندرج مادهدن  
مستبان اولقدهدر.

او صروده ذات شاهانهك روسيه ايله كيزلى مشاركتندن ده شبهه  
ايدليكندن بوندن تولد ايدمبيلهك احتمالاته قارشى استلافنامهيه بر  
سكزنجنى ماده علاوه قلمشيدى كه شودر:

« مع مافيه دول ثلثه نظرندم باب عالينك طور و حركتى بويله  
مخالف عهد بر تشبده مشاركت ماهيتنى اكتساب ايدمك اولورسه  
دول مشاراليهم، معاهدات حاضريه بالابتناء معاهدات سابقه ايله تعيين  
ايتمش اولان مقصدى تايمين ايچون ممالك عثمانيه دن مناسب كوره جكلرى  
نقاطى قواى بريه و بحريه لريله مشتركاً و يامنفرداً اشغال ايتمك صلاحيتنى  
حائز بولنه جقلردر. » بو مقاوله بالطبع محرم طوتيله جق ايدى.

دول ثلثهك توريكه يه حقنده كي علاقه لرينه، در سعادت سفيرلرندن  
مركب و امور ماليه مزك اصلاحي مقصديله تشكىل ايدن بر قونفرانس ايله  
علانيت و يريلدى. بيسمارق دخى، اردوى عثمانينك و على الخصوص  
قافقاس حدودنده كي قول اردونك سرعتله تنسيق اولمىنى و بونلرك  
آلمان ضابطلارى اداره سنه توديعيله جهت شرقيه ده هر درلو روس  
مداخله سنه قارشى آوستريا - مجارستان ايله بالاتحاد لى الحاحه حربه  
كيريشمكه حاضر بولنديرمىنى ذات شاهانه يه براى تكليف موسيو  
رادوويچ Radowicz ي مأمور اعزام ايتدى. باب طالى، هر قدر  
بويولده حركتى ترويج و توصيه ايلشسه ده بويله جدى قرارلر اتخاذهدن  
عاجز و بر دولتى ديكرى عليهنده قوللانمغه مألوف اولان سلطان

عبدالحمید، آلمان تسکلیفی رد ایتش و سلتنطک استقبالی تأمین ایدمه بیله جک اولان بو فرصت غیر مترقیه یی ده قاجیرمش ایدی .

آنفال بیان اوج دولتک برلشمسیله مقصدک حاصل اولدیغنه قانع اولان بیسمارق ، شرقه دائر اولان اشبو اتفاق مثله بالذات اشتراکدن توقی ایتشیدی ، و ۱۸۸۷ سنه سی تشرین ثانینسک یکرمی ایکیمی تاریخیه لورد سولیسبوریه یازدیغی بر مکتوبده : « ذات شاهانه بزم دوستمزد و کندیسنگ خیر خواهی یز ؛ فقط بو خیر خواهلوق ایله اونک اغورنده حربه کیریشمک آره سنده خیلی مسافه اولوب آلمان ملتی ایسه او مسافه یی قطعه اجبار ایدیه مز . » [۱] دیو یازمشیدی .

آلمانیا یی براوروپا اتحادی تهلکه سندن مصون بولندیره جق اولان سلسله اتفاقات ۱۸۷۹ تشرین اولنده کی آوستریا - مجارستان اتفاق ایله ابتداء ایدیوردی . ۱۸۸۱ مایسنده بیسمارق بو اتفاق ایله محاذی اوله رق ۱۸۷۲ ده اوج ایمپراطور اتفاق دیمکه معروف اولان اتفاق کبی آلمانیا ، آوستریا و روسیه ایمپراطورلری بیننده بر اتفاق مثلت احضار و آندن برسنه صکره آوستریا ایله اولان خصوصی اشتلافی - ایتالیا نك التحاقیه - مثلت براتفاقه تحویل ایلوردی . بو اتفاق مثلت ۱۸۸۷ ده دیگر بر اتفاق ایله تأید ایدیوردی که اوده ، بالاده بیان اولندیغی اوزره ، انکلتره ، آوستریا و ایتالیا میاننده منعقد ایدی ؛ چونکه بیوک بریتانیا دولتک قدرت بحریه سنه بناء بحر سفید و بالقان مسائلنده متفقرینه قارسی آلمانیا نك درعهده ایدمه جکی تعهداتی انکلتره درعهده ایتش اولور ایدی . بیسمارق ، روسیه نك شرق

1 O. Hammann « zur Vorgesch. d. Weltkr p. 156 - Berluf 1918.



قریه طوغری انبساطنه بو صورتله سد چکمهکه برابر ۱۸۸۷ ده -  
پترسبورغ ایله عقد ایتدیکی تأمینات متقابله عهدنامه سینه رغماً -  
دولت عثمانیه یی کندی متفقرنی طرفنه کچمهکه دعوت ایتدیکنی ده  
بالاده ذکر ایتدک .

بیسمارک اشبو سیاست شرقیه سنی تمامیه میدان قویق ایچون  
موسیو هامان Hammann ک اثرندن ترجمه ایدلمش اولان شو فقره یی  
قید ایدلم : [۱]

« آلمانیا ایمپراطوری، آوستریا - مجارستانله اولان اتقاقی ایله کندیسنی  
طونه تک قسم سفلاسنده کی آوستریا - مجارستان منافعی اغورینه روسیه  
ایله محاربه تهلهکه سینه معروض قیلیمش ایدی. بوکا قارشى برتدیر اوله رق  
بیسمارک ۱۸۸۱ ده اوچ ایمپراطور بیننده بر ائتلاف احداث ایتدی که  
بو ائتلاف مرکز ثقلتنی، متن اصلیسینک احتوا ایتدیکی بیطرفلق  
ماده سندن زیاده بر دردنجی حکومت قارشى محاربه حالنده بالقانلرده  
موجود منازع فیه منافع حقنده کی ائتلاف تشکیل ایدیور ایدی . بو  
ائتلافه کوره اوستریایه ایستریکی زمايه بوسنه وهرسکی کندی ممالکینه  
صورت رسمیه ده الحاق ایلمک حق ویرلمشیدی ؛ برلین معاهده سنک  
یکی بازار سنجاغنه دائر اولان مقرراتی مرعی الاجرا قلاجق ایدی ؛  
بلغارستان ایله روم ایلی شرقینک تورکیه علیه اعلان خصومتدن  
متوق بولنملری شرطیه تورکیه نکه ده روم ایلی شرقیه و بالقان ممالکینه  
استیلاسنه مساعدده اولنماسی مقرر ایدی ؛ بلغارستان ایله روم ایلی  
شرقی برلشدکلرینی اعلان ایتمک حقنی حائر بولنه جقلر ايسه ده بونلرک

